

San Juan cheja cho'ocojñojañere Diopi ñokuna ñaku tochasi'ea'me

Dios Jesucristo'te i'kaku ñosi'ere khamu

¹ Ie chũ'o iphũro tochasi'e icheja cheja churepara cho'ocojñojañere Dios Jesucristo'te kũaku ñosi'easomũ, Ũcuauji Repau neenani ũcuare ñokũ kũaa'kũ chini. Diopi kũaku ñoũna Jesucristo asa chũ'u Juan Repau'te cho'oche cho'okaikũ pa'ichejana ángelni raosi'kũa'mũ, ũcuare chũ'uni kũaku ñoa'kũ chini.

² Dios i'kasi'ere ángelpi rani ñokũ kũauna asa ũcuare kũaku ie tocha saomũ chũ'u mũsanũkonare.

³ Ũcuauakũ'te pãiu'te iphũro tochasi'ere ñaku i'kakaikũ'te re'oja'che ti'jñeja'mũ. Repau ñaku i'kakaiche'te asa chẽa cho'onare ũcuachi'a re'oja'che ti'jñeja'mũ. Iphũro tocha kũasi'e cho'orũmũ tĩ'arĩ'ramũ.

*Jesucristo'te cuasakuanupũãre sieterepa-
joopoã canare Juan tocha saosi'ere khamu*

⁴ Chũ'u, Juanpi, mũsanũkonare Asia cheja cajoopoã sieterepajoopoã canare Jesucristo'te cuasakuanupũãre iere chũ'o tocha saomũ: Dios irũmũ pa'imũ. Chuta'a cheja cho'omarũmũ pa'ikũasomũ Repau. Ũcuachi'a si'arũmũ pa'ikũ'mũ Repau. Ũcuauji oiũ re'oja'che cho'okaau mũsanũkonare, pojojũ paaru

chini. Ûcuachi'a Dios Rekocho Repau chũ'uku ñu'isaivu ti'jñeñe'te pa'iu re'oja'che Cho'okairekochoji oiu re'oja'che cho'okaaũ mʉsanʉkonare, pojoju paapu chini.

⁵ Ûcuachi'a Jesucristo Dios pa'iche chu'o ũcuarepa Kʉakʉji oiu cho'okaaũ mʉsanʉkonare, pojoju paapu chini. Repau Jesucristo jo'e jũ'imatejañere chareparo jũni vajʉraisi'kua'mʉ. Ûcuachi'a cheja pa'inare pãi chũ'unare ũcuauko Aia'mʉ Repau. Repau Jesucristo maini oiu mai cu'ache cho'ochete ro'ikaiu jũnisõsi'kua'mʉ.

⁶ Repau Jesucristo maire Repau chũ'uñe'te cho'ojʉ na'a pa'isirumuna Repauna'me chũ'ujʉ paapu chini chẽa paamʉ. Ûcuachi'a maipi Repau Pʉka'kʉni Dioni phairipãi cho'okaicheja'che cho'okaiju paapu chini jo'kamʉ Repau maire. Pãi ũcuauko cuasaju si'arumʉ cuhama'ñe re'oja'che i'kaju paapu Repau'te. Ûcuachi'a Repauji pãi ũcuaukore si'arumʉ chũ'uku paau. Jã'aja'ñe paau.

⁷ Dios Raosi'kʉre Cristo'te pikona'me cajeuna pãi ũcuauko ñajanaa'me,

Repau'te vanisõsina jojosinajatu'ka.

Pãi si'achejña pa'ina Repauni ña kʉkʉcajejani rʉa oijanaa'me.

¡Jã'aja'ñe paau!

⁸ Pãi Ûcuaukore Paaku Dios, Peore Masiu ija'che i'kamʉ: “Chuta'a cheja cho'omarumjẽ'e pa'iu si'arumʉ pa'iku'mʉ chu'u”, chiimʉ. Dios irumjẽ'e pa'iu chuta'a cheja cho'omarumʉ

pa'ikuasomũ Repau. Ũcuachi'a si'arumũ
pa'iku'mũ Repau.

*Jesucristo'te vajuchũache ñokũ'te ñasi'ere
kũamũ*

⁹ Chũ'ũ, Juan, mũsanũkona Cuasaku'te
Jesucristo'te cuasakũjekũ mũa'chũja'iu'mũ.
Mũsanũkonare Jesucristoni cuasajũna cu'ache
ti'jñeñeja'ñe chũ'ũre ũcuaja'che Repau'te
cuasakũjekũna ũcuaja'che ti'jñesi'kũa'mũ.
Maire Paakũ Jesucristo cho'okaimũ maire,
cu'ache ti'jñecoñonijẽ'e Repau'te cuasache'te
ũhasõmanea'jũ chini. Aperũmũ chũ'ũpi Dios
chũ'ore chũ'vakũ Jesucristo pa'iche'te kuakũna
asa pãi chũ'ũre chẽa, pãi peojuupona Patmos
juupona sa jo'kasõsinaa'me.

¹⁰ Sa jo'karena pa'iu pũaumucusena Dios
Rekochoji cho'okũna chũ'ũ cho'jepi pãiu i'kache
trompetavũ juhijũna rũa asocheja'che rũa
i'kache'te asasi'kũa'mũ chũ'ũ.

¹¹ Chũ'ũre i'kache ija'che chiiche'te
asasi'kũa'mũ chũ'ũ: "Chuta'a cheja
cho'omarũmũjẽ'e pa'iu si'arumũ pa'iku'mũ
chũ'ũ. Mũ'ũ ñajañe utija'okorovũna tocha
Asia cheja cajoopoã sieterepajoopoã canani
Jesucristo'te cuasakuanupũãre saojũ'ũ, Efeso
vũ'ejoopo canare, Esmirna vũ'ejoopo canare,
Pérgamo vũ'ejoopo canare, Tiatira vũ'ejoopo
canare, Sardis vũ'ejoopo canare, Filadelfia
vũ'ejoopo canana'me Laodicea vũ'ejoopo
canare", chiiche'te.

¹² Jã'aja'ñe i'kaũna asa chũ'ũre i'kasi'kũni
ñara chini chũ'ũri'kũa'mũ chũ'ũ. Chũ'ũri ñato

pachokuripi cho'osisaivũa ã ãoñoã pa'isaivũapi sieterepasaivũa ã ãakasi'kũa'mũ.

13 Ûcuaja'che repasaivũa chenevũana Jesu-cristo'te Dios Raosi'kũre maija'iu ãakakũni ãasi'kũa'mũ chũ'ũ. Kãa cũ'achajatũ'ka repacuecho pa'ikãa ju'ikũji ã'capũ pachokurime'te tãisi'kũa'mũ Repau.

14 Repau raña oveja rañaja'ñe poja'isi'kũa'mũ. Ûcuaja'che nieve poja'icheja'che pojaraña paasi'kũa'mũ. Repau ãakocaã toaja'che ãosi'kũa'mũ chũ'ũre.

15 Repau cũ'a pachocũana toana pojũana ko'sija'icheja'che ko'sijacũ'a paasi'kũa'mũ Repau. Ûcuachi'a, Repau i'kache okopi chã'iu asocheja'che asosi'kũa'mũ chũ'ũre.

16 Repau ãajajũture ma'jũoko sieterepanare cãjisi'kũa'mũ. Ûcuachi'a Repau chũ'opoji va'ti ka'chakã'jũo jũjũsũva'tipi etasi'kũa'mũ. Repau chia ãcuachi'a re'o pa'iuña ãsũũ rũa miakũ ko'sija'icheja'che rũa ko'sijachia ãosi'kũa'mũ chũ'ũre.

17 Repauñi ãa jũnisõsi'kũja'che repau ti'jũeñena tãisi'kũa'mũ chũ'ũ. Tãni ãhiũana ãajajũtupi jakũ ija'che i'kasi'kũa'mũ repau chũ'ũre: “Vajũchũmanejũ'ũ. Chuta'a cheja cho'omarũmjẽ'e pa'iu si'arũmũ pa'ikũ'mũ chũ'ũ.

18 Ai pa'ikũ'mũ chũ'ũ. Jũnisõsi'kũta'ni vajũrani pa'iu si'arũmũ pa'ijachere pa'ikũ'mũ chũ'ũ. Chũ'ũre llavemaka paakũja'che pa'iuña pãire jũ'isina pa'ichejana chũ'ũ saouato chũ'ũre'omũ. Æseuato ãsere'omũ.

19 Mũ'u ñasi'e chura cho'ocojñoñena'me cho'je cho'ocojñojañe peore tochajũ'u.

20 Mũ'u ñasi'e pa'iche chũ'uchi'a masiche'te mũ'upi masia'ku chini kuaja'mũ chũ'u mũ'ure, chũ'u ɱjajũtu cãjisi'e ma'jñoko pa'ichena'me ɱoñoã pa'isaivũã pachokuripi cho'osisaivũã pa'iche. Ma'jñoko sieterepana mũ'u ñasina Jesucristo'te cuasakuanupũãre sieterepajoopõã canare chũ'unaja'ñea'me. Ũcuachi'a ɱoñoã pa'isaivũã sieterepasaivũã mũ'u ñasi'e Jesucristo'te cuasakuanupũã sieterepajoopõã canaja'ñea'me", chiisi'kuamũ Repau chũ'ure.

Sieterepajoopõã pa'inare Jesucristo'te cuasakuanupũãre tocha saosi'ere kuamu

2

Efeso vũ'ejoopo canare chũ'o tocha saosi'ea'me

1 Ũcuarũmũ Jesucristo jo'e i'kasi'kuamũ chũ'ure. "Efeso vũ'ejoopo canare chũ'ure cuasakuanupũ chũ'ũku'te ija'chere tocha saojũ'u mũ'u", chiisi'kuamũ.

Chũ'u ɱoñoã pa'isaivũã sieterepasaivũã chenevũji ma'jñoko sieterepanare ɱjajũture cãjikũ nũka ku'ikũji Jesucristo ija'che i'kamũ mũsanũkonare:

2 Mũsanũkona cho'ojũ pa'iche peore masimũ chũ'u. Chũ'u chũ'ũñe rua cho'ome mũsanũkona. Chũ'uni cuasajũna mũsanũkonare cu'ache ti'jñetojẽ'e re'oja'che pa'iche ũhasõma'me mũsanũkona. Ũcuachi'a cu'ache cho'onare ja'me pa'icuhenaamẽ mũsanũkona.

Ûcuachi'a chũ'u chũ'o che'chokaimanapi, "Jesucristopi raõna Repau chũ'o che'chonaa'me chũkũna", chiijuña asani, "¿Ûcuanaa'ñe ina? ¿Jorenaa'ñe?", chini cuasa repaña pa'iche'te ña masi, "Jorenaa'me ina", chiinaa'me mũsanũkõna.

³ Iere masimũ chũ'u: Chũ'u chũ'uñe cuhama'ñe cho'õju pa'inaa'me mũsanũkõna. Chũ'uni cuasajuña mũsanũkonare cu'ache ti'jñetojẽ'e chũ'u chũ'uñe ùhasõma'ñe ùcua cho'õju pa'ime mũsanũkõna.

⁴ Jã'ata'ni mũsanũkõna pa'iche iere cuhemũ chũ'u: Chũ'ure mũsanũkõna apescuasarũmũ rũa chiisinaa'me. Jã'ata'ni chura ùhasõ aperũmũ chiisi'eja'che chiima'me mũsanũkõna chũ'ure.

⁵ Mũsanũkõna aperũmũ chũ'ure rũa chiisi'ere cuasaju mũsanũkõna pa'iche saño cu'ache cho'õche'te ùhasõ mũsanũkõna aperũmũ re'õja'che cho'õju pa'isi'eja'che jo'e cho'õju pa'ijũ'ũ, chũ'uni rũa chiiju. Jã'aja'ñe cho'õma'to chũ'u rani mũsanũkõna uõñoã pa'isaiũ tũasõja'mũ.

⁶ Jã'ata'ni nicolaítapãi cu'ache cho'õche'te chũ'u cuhecheja'che ùcuaja'che cuheju re'õja'che cho'õnaa'me mũsanũkõna.

⁷ Chũ'ure cuasakuanupũãre Dios Rekocho i'kache asa chẽa cho'õuana ùcuauũko asa chẽajũ'ũ. Dios Rekocho ija'che i'kamũ: "Jesucristoni cuasaju cu'ache cho'õcojñõnata'ni Repau'te cuasache ùhamanesinare vajũsũkiñũ Dios pa'icheja cañũ kũisi'ere ãuja'mũ chũ'u", chiimũ, chiisi'kũa'mũ Jesucristo.

Esmirna vñ'ejoopo canare chũ'o tocha saosi'ea'me

⁸ Ūcuarũmũ Jesucristo jo'e i'kasi'kũa'mũ chũ'ũre. "Esmirna vñ'ejoopo canare chũ'ũre cuasakuanupũ chũ'ũku'te ija'chere tocha saojũ'ũmũ'ũ", chiisi'kũa'mũ.

Chuta'a cheja cho'omarũmũjẽ'e Si'arũmũ Pa'ikũji jũnisõ vajũraisi'kũ Jesucristo ija'che i'kamũ chũ'ũ mũsanũkonare:

⁹ Mũsanũkona cho'oju pa'iche peore masimũ chũ'ũ. Chũ'ũni cuasajũna mũsanũkonare cu'ache ti'jñeñe masimũ chũ'ũ. Ūcuachi'a mũsanũkona neemajñarũã chekũnapi cuheju tatesõrena mũsanũkona chũova'na pa'iche masimũ chũ'ũ. Jã'ata'ni mũsanũkona rekoñoã kurina pa'icheja'che karama'ñe re'oja'che pa'ijanaa'me mũsanũkona. Ūcuachi'a, "Judío pãijeju Dios neenaa'me chũkũna", chiinapi mũsanũkonare cu'ache cutuche masimũ chũ'ũ. Jã'ata'ni vati chũ'ũñechi'a cho'onajeju repaũ neenaa'me repaña.

¹⁰ Mũsanũkonare cu'ache ti'jñejañere cuasani vajũchũmanejũ'ũ. Asarepajũ'ũ. Mũsanũkonare vati chũ'ũre cuasache'te ũhasõ'aju chini pãipi mũsanũkonare pãi chẽavũ'ena cuaoa'ju chini chũ'ũja'mũ. Dierepaumucujña cu'ache cho'ocojñojũ chũova'na pa'ijanaa'me mũsanũkona. Chũ'ũni cuasajũna pãi chekũrũmũ mũsanũkonare vanisõñũ chiijanaa'me. Jã'ata'ni jã'aja'ñe cho'oto jũ'iñe'te vajũchũju chũ'ũre cuasache ũhasõmanejũ'ũ mũsanũkona. Chũ'ũre cuasache ũhasõmaneru Dios pa'ichejare

ai sani paapu chini jo'kaja'mu chu'u musanukonare.

¹¹ Chu'ure cuasakuanupua're Dios Rekocho i'kache asa chea cho'omana ucuanuko asa cheajũ'u. Dios Rekocho ija'che kuamu: "Musanukona Jesucristoni cuasaju cu'ache cho'ocojñonata'ni Repaute cuasache'te ũhasōmaneni vati toa saimanejanaa'me", chiimu, chiisi'kuamũ Jesucristo.

Pérgamo vu'ejoopo canare chu'o tocha saosi'ea'me

¹² Ūcuarumu Jesucristo jo'e i'kasi'kuamũ chu'ure. "Pérgamo vu'ejoopo canare chu'ure cuasakuanupũ chu'ũku'te ija'chere tocha saojũ'u mu'u", chiisi'kuamũ.

Repaũ chu'opo'te va'ti ka'chakã'jño jũjusuva'ti Paakũji Jesucristo ija'che i'kamũ chu'u musanukonare:

¹³ Musanukona cho'ojũ pa'iche peore masimu chu'u. Vati ai chu'ũcojñona pa'ijoopo pa'inata'ni chu'ure cuasache ũhasōma'ñe ũcua cuasaju pa'inaa'me musanukona. Ūcuauji chu'ũuna repaũ chu'ũne cho'ona chu'u pa'iche masi kuakaiku'te Antipare vanisōñe ñasinata'ni chu'ure cuasache ũhasōmanesinaa'me musanukona.

¹⁴ Jã'ata'ni musanukona pa'iche iere cuhemũ chu'u: Musanukonare ja'me pa'ina te'ena aperumu pa'isi'ku Balaam chu'vasi'ēja'che chu'vana chu'vache ũhacuhena pa'ime. Aperumu repaũ Balaam Israelpãire cacu'oa'ku chini Bala'te rãa chu'vaasomu. Chu'vauna asa

repaũ Balac Israelpãire cacũ'ora chini, “Rupũ tũosiva'nare, Dioa'mũ ikũ, chiicojñonare ĩsisi'e ãu ãiju pa'ijũ'ũ. Ũcuachi'a pãĩ ũcuauanare ja'me kãiju pa'ijũ'ũ”, chiũ rũa chũ'vaasomũ, repnanĩ cacũ'orepara chini.

15 Ũcuachi'a mũsanũkonare ja'me pa'ina te'ena nicolaĩtapãĩ chũ'vache ũhacuhena pa'ime.

16 Jã'ajekũna repna chũ'vache'te ũhasõ Dioni cuasajũ jovojuũ'ũ. Jã'aja'ñe cho'oma'to jma-makarũ pa'isirũmũna mũsanũkona pa'ichejana sanĩ chũ'ũ chũ'opo etava'tipi cu'ache cho'oja'mũ chũ'ũ repnare.

17 Chũ'ũre cuasakuanupũãre Dios Rekocho i'kache asa chẽa cho'ouana ũcuauũko asa chẽajũ'ũ. Dios Rekocho ija'che i'kamũ: “Jesucristoni cuasajũ cu'ache cho'ocojñonata'ni Repaũ'te cuasache ũhamanesinare chũ'ũ cũnaũmũ chawe paache manacaãre ãuja'mũ chũ'ũ. Ũcuachi'a catapũã pojarũãre repna mami mamare tochasipũãre te'erũãchi'a ĩsija'mũ chũ'ũ repnare. Repna mami mama te'eujẽ'e masimanejanaa'me. Catapũ koosi'kũchi'a masija'mũ”, chiimũ, chiisi'kũa'mũ Jesucristo.

Tiatira vũ'ejoopo canare chũ'o tocha saosi'ea'me

18 Ũcuarũmũ Jesucristo jo'e i'kasi'kũa'mũ chũ'ũre. “Tiatira vũ'ejoopo canare chũ'ũre cuasakuanupũ chũ'ũku'te ija'chere tocha saojũ'ũ mũ'ũ”, chiisi'kũa'mũ.

Ñakocaã toñaja'ñe Paakujì chũ'u cũ'a pachocũna toana pojũna ko'sija'icheja'che ko'sijacũ'a Paakujì Dios Mamakũ ija'che i'kamũ chũ'u mũsanũkonare:

19 Mũsanũkona cho'ojũ pa'iche peore masimũ chũ'u. Chũ'ũni chiijũ cuasame mũsanũkona. Ũcuachi'a chũ'ũre cuasanare oijũ re'oja'che cho'okainaa'me mũsanũkona. Chũ'ũni cuasajũna cu'ache ti'jñetojẽ'e chũ'ũre cuasache ũhasõmanaa'me mũsanũkona. Mũsanũkona mama cuasarũmũ cho'osì'e na'a rũa re'oja'che cho'ojũ pa'ime chura.

20 Jã'ata'ni mũsanũkona pa'iche iere cuhemũ chũ'u: Jezabel cu'ache chũ'vache mũsanũkona ãsema'ñere. “Dios chũ'o kũako'mo chũ'u”, chiiko'mo repao. Jã'ata'ni mũsanũkonare chũ'u neenare cu'ache'te chũ'vako te'enare cacũ'osõmo repao. Ũcuaoji chũ'vakona asa chẽa re'oja'che pa'iche ũhasõ pãì ũcuauanare ja'me kãijũ pa'ime repaña. Ũcuachi'a rupũ tũosiva'nare, “Dioa'mũ ikũ”, chiicojñova'nare jo'kasi'e ãu ãijũ pa'ime repaña.

21 Repao cu'ache cho'oche'te ũhasõ re'oja'che paaò chini chuta'a cu'ache cho'oma'ñe cha'amũ chũ'u repao'te. Jã'ata'ni chuta'a ũcuauanare ja'me kãĩñe ũhasõma'mo repao.

22 Jã'ajekũna repao'te ravũ cho'oja'mũ chũ'u. Repao'te ja'me kãĩnare ũcuachi'a repañapi cu'a cho'oche'te ũhasõma'to rũa cu'ache ti'jñeñe cho'oja'mũ chũ'u repañare.

23 Repao mamachĩi ũcuachi'a vanisõja'mũ chũ'u. Chũ'ũpi jã'aja'ñe cho'oũna asani chũ'ũre cuasakuanupũã ũcuauũko chũ'u pãì

ũcuanũko cuasachena'me repaña rekoñoã pa'iche peore masiche masijanaa'me. Ũcuachi'a mũsanũkonare te'enarechi'a re'oja'che cho'osi'ena'me cu'ache cho'osi'e ro'iche chũ'ũja'mũ chũ'ũ.

²⁴ Mũsanũkona Tiatira vũ'ejoopo cana te'ena repao cu'ache chũ'vache asacuhena pa'ime. Ũcuachi'a, "Vati ai te'eũ masiche'te che'chonaa'me chũkũna", chiina chũ'vache asaũ chiima'ñe pa'inaa'me mũsanũkona. Cheke na'a rũa cho'ovesache chũ'vama'mũ chũ'ũ.

²⁵ Jã'ata'ni, "Mũsanũkona chũ'ũre cuasache ũhasõma'ñe chũ'ũ jo'e rairũmũjatũ'ka cuasajũ pa'ijũ'ũ", chiiũ chũ'vamũ chũ'ũ.

²⁶ Mũsanũkonapi cu'ache che'chona chũ'vache'te asa cho'oma'ñe chũ'ũ chũ'ũñechi'a jũnisõrũmũjatũ'ka ũhasõma'ñe cho'oru pãi si'achejña pa'inare chũ'ũñe'te jo'kaja'mũ chũ'ũ mũsanũkonare.

²⁷ Chũ'ũre Ja'kũ pãire chũ'ũa'kũ chini jo'kasi'ejache mũsanũkonare pãi si'achejña pa'inani chũ'ũa'jũ chini jo'kaja'mũ chũ'ũ. Dios chũ'o aperũmũ tocha jo'kasi'e mũsanũkona chũ'ũjũ cho'ojachere ija'che kũamũ:

Pãire chũ'ũjũ repañare cuhenare cu'ache chũ'ũjanaa'me repaña,

chiiũ.

²⁸ Ũcuachi'a chũ'ũ pa'icheja si'arũmũ sani pa'ijachena'me cheke si'ache re'oja'che ñsija'mũ chũ'ũ mũsanũkonare.

²⁹ Chũ'ũre cuasakuanũpũãre Dios Rekocho i'kache asa chẽa cho'õana ũcuanũko asa chẽajũ'ũ,

chiisi'kua'mu Dios Mamaku.

3

Sardis vñ'ejoopo canare chu'o tocha saosi'ea'me

¹ Ũcuarumu Jesucristo jo'e i'kasi'kua'mu chu'ure. “Sardis vñ'ejoopo canare chu'ure cuasakuanupu chũ'uku'te ija'chere tocha saojũ'u mu'u”, chiisi'kua'mu.

Dios Rekocho re'oja'che Cho'okairekocho Paakujji ma'jñoko sieterepanare Cäjikujji Jesucristo ija'che i'kamu chu'u musanukonare: Musanukona cho'ojũ pa'iche peore masimu chu'u. Pãi musanukona pa'iche ñani, “Dioni cuasaju Repau chũ'uñe cho'onajeju re'oja'che pa'inaa'me ina”, chiime. Jã'ata'ni rekoñoã cu'ache cuasaju pa'inaa'me musanukona.

² Jã'ajekuna musanukona che'chesi'ere Dios chũ'uñe'te cavesuma'ñe cho'ojũ pa'ijũ'u, cu'ache pa'imaneñu chini. Diopi ñato re'oja'che cho'omanaa'me musanukona.

³ Ũcuachi'a musanukona che'chesi'ere Dios chũ'uñe'te cavesuma'ñe cuasaju cu'ache cho'ochete ũhasõ aperumu musanukona cho'osi'aja'che re'oja'chere cho'ojũ pa'ijũ'u. Musanukona che'chesi'e Dios chũ'uñe cho'oma'to põse ñaaũ rai cuasomarumuna raicheja'che rani cu'ache cho'oja'mu chu'u musanukonare.

⁴ Jã'ata'ni musanukona te'ena Dios chũ'uñe che'chesi'ere cavesuma'ñe ũcua cuasaju cho'ojũ re'oja'che pa'ime. Musanukona re'oja'che pa'iche ro'i Dios pa'ichejare sani pa'iju kãña pojakãñare

ju'ijɨ chʉ'ɨnɑ'me nʉkɑ kuharɨ chini jo'kɑjɑ'mɨ chʉ'ɨ.

⁵ Ũcuachi'a chʉ'ɨni cuasajɨ cu'ache cho'ocojñonata'ni chʉ'ɨre cuasache ũhamanesina Dios pa'ichejare sani pa'ijɨ kãña pojakãñare ju'ijɨ pa'ijanaa'me. Ũcuachi'a Diona'me pa'ijana cɨnɑɨmɨ pa'iphɨro utija'ophɨro tochasi'e repɑnɑ mami tɨnosõmanejɑ'mɨ chʉ'ɨ. Jã'aja'ñe cho'oma'ñe na'a pa'isirɨmɨna Jɑ'kɨnɑ'me Repɑɨ neenɑ ángeles asajɨ'te, “Chʉ'ɨ neenɑa'me inɑ”, chiija'mɨ chʉ'ɨ repɑnare, chʉ'ɨre cuasache ũhamanesinare.

⁶ Chʉ'ɨre cuasakuanurɨãre Dios Rekocho i'kache asa chẽɑ cho'omɑnɑ ũcuanɨko asa chẽajũ'ɨ, chiiisi'kɨɑ'mɨ Jesucristo.

Filadelfia vɨ'ejoopo canare chʉ'o tocha saosi'ea'me

⁷ Ũcuarɨmɨ Jesucristo jo'e i'kasi'kɨɑ'mɨ chʉ'ɨre. “Filadelfia vɨ'ejoopo canare chʉ'ɨre cuasakuanurɨ chũ'ɨkɨ'te ija'chere tocha saojũ'ɨ mɨ'ɨ”, chiiisi'kɨɑ'mɨ.

Chʉ'ɨ Jesucristo re'oja'chechi'a Cho'okɨ jma-makarujẽ'e jorema'kɨɑ'mɨ. Apeɨmɨ pa'isi'kɨ David pãi chũ'ɨsi'ejɑ'che chũ'ɨmasikɨ'mɨ chʉ'ɨ, David Jojosi'kɨjekɨ. Jã'ajekɨnɑ chʉ'ɨpi chũ'ɨto pãiu'te te'eɨ'terejẽ'e chʉ'ɨ chũ'ɨñe ũsecu'amɨ. Ũcuachi'a chʉ'ɨpi chũ'ɨma'to pãiu'te te'eɨ'terejẽ'e chũ'ɨcu'amɨ. Jã'aja'ñe Pa'ikɨji Jesucristo ija'che i'kamɨ chʉ'ɨ mɨsanɨkonare:

8 Mʉsanʉkona cho'oju pa'iche peore masimu chu'u. Asarepajũ'u. Te'eva'nata'ni chu'u chu'ore asa jachama'ne pa'iju chu'ure cuasache'te ũhasõmapuna jatisa'aro vatakaicheja'che cho'okaimu chu'u musanʉkonare, chu'u chũ'uñe'te cho'oju paapu chini. Repasa'aro pãiu'te te'eu'terejẽ'e jeocu'acheja'che chu'u chũ'uñe musanʉkona cho'ochẽ pãiu'te te'eu'terejẽ'e ũsecu'aja'mu.

9 Ũcuachi'a vati ai neenapi, "Judío pãijeju Dios neenaa'me chukuna", chiiju jorenapi musanʉkona ti'jñeñena ro're ñuapu chini chũ'ujamũ chu'u. Musanʉkona pa'iche'te ñaju, ro're ñu'iju, "Jesucristo oicojñonaa'me ina", chiiju masijanaa'me repa.

10 Chu'u musanʉkonare, "Chu'uni cuasaju cu'ache cho'ocojñonata'ni chu'ure cuasache ũhasõmanejũ'u", chiu chũ'usi'ere jachama'ne ũcuarepa cho'onajejuna pãĩ ũcuankore cu'ache ti'jñerumu tĩ'aru cho'okaijamũ chu'u musanʉkonare. Reparumu tĩ'ato pãĩ ũcuankore chu'upi repa rekoñoãna kuauna repa chu'ure masi cuasachena'me cuasama'ne meñe cuasa masijanaa'me.

11 Cuasarepaju pa'ijũ'u. Na'mi cajejamũ chu'u. Musanʉkona che'chesi'e Dios chũ'uñe ũhasõma'ne cuasaju cho'oju pa'ijũ'u. Jã'aja'ne cho'oni Dios re'oja'che ñira chiiche koojanaa'me musanʉkona ũhasõmanesi'e ro'i. Jã'aja'ne cho'oru te'eu'jẽ'e tua koosõkaimanejanaa'me musanʉkonare.

12 Chu'uni cuasaju cu'ache cho'ocojñonata'ni chu'ure cuasache ũhasõmanesinare Dios vu'e

catuupũ etama'ñe ai pa'icheja'che Repau pa'ichejare ai sani paarũ chini jo'kauna repacheja jmakakarujẽ'e etama'ñe si'arũmũ pa'ijanaa'me repana. Dios neenajejũ Repau pa'ijoopo Jerusalén mama vũ'ejoopo canaa'me ina, chiimũ chũ'u. Dios repajoopo cũnaũmũpi casoja'mũ. Ñcuachi'a repanare chũ'u mami mamare ve'oja'mũ chũ'u.

13 Chũ'ure cuasakuanupũãre Dios Rekocho i'kache asa chẽa cho'oũana ñcuauko asa chẽajũ'u, chiisi'kũa'mũ Jesucristo.

Laodicea vũ'ejoopo canare chũ'o tocha saosi'ea'me

14 Ñcuarũmũ Jesucristo jo'e i'kasi'kũa'mũ chũ'ure. “Laodicea vũ'ejoopo canare chũ'ure cuasakuanupũ chũ'ũku'te ija'chere tocha saojũ'u mũ'u”, chiisi'kũa'mũ.

Chũ'u Jesucristo chũ'u cho'ora chiiche peore ñcuarepa cho'okũ'mũ. Ñcuachi'a chũ'u ñasi'e jorema'ñe ñcuarepare kũakũ'mũ chũ'u. Diopi chũ'ũũna chejana'me pãi peore cho'oasomũ chũ'u. Jã'aja'ñe Pa'ikũji Jesucristo ija'che i'kamũ chũ'u mũsanũkonare:

15 Mũsanũkona cho'ojũ pa'iche peore masimũ chũ'u. Mũsanũkona chũ'ure cuasanata'ni masi cuasama'me. Ñcuachi'a chũ'ure masi cuasamanata'ni mũsanũkona ñhasõma'ñe pa'iche masimũ chũ'u. Jã'ajekũna mũsanũkonapi chũ'ure chini rũa cuasato rũa re'ora'amũ. Jã'ata'ni chũ'ũni masi cuasacuheni ñhasõjũ'u chiimũ chũ'u.

16 Chũ'ure cuasache ũhama'me mʉsanʉkona. Jã'ata'ni chũ'ure rʉa cuasama'me. Jã'ajekuna mʉsanʉkonare chũ'ure cuasanata'ni masi cuasamanajejuna oko jmajũũru asuche ũku ña rũocuhekũ tutusõñeja'ñe cuheja'mʉ chũ'ũ mʉsanʉkonare.

17 Ija'che i'kanaa'me mʉsanʉkona: “Pãi kurina karama'ñe paacheja'che chũkuna chiiche peore paajũ re'oja'che pa'ijuna te'emakarũjẽ'e karama'kua'mʉ chũkuna'te”, chiinaa'me. Jã'aja'ñe i'kanata'ni cu'ache pa'ijũ mʉsanʉkona rekoñoã ñakocaã na'asõsinaja'ñe chũova'na pa'ijũ kãña peova'naja'ñe pa'inaa'me mʉsanʉkona. Jã'aja'ñe pa'inata'ni mʉsanʉkona rekoñoã pa'iche vesũme.

18 Jã'ajekuna mʉsanʉkonare ija'che chũ'vamʉ chũ'ũ: Mʉsanʉkona rekoñoãpi pãi kurina karama'ñe pa'icheja'che re'oja'che pañu chini chũ'ũni pachokurija'chere re'oja'chere koojũ'ũ. Ũcuachi'a mʉsanʉkona ca'nivũã kãña peojũ ju'imarũna vajũchũache ñosica'nivũãre sacha juñu chini chũ'ũni kãña pojakãñaja'ñere koojũ'ũ. Ũcuachi'a mʉsanʉkona ñakocaã suirijache mũkoja'che chũ'ũni koojũ'ũ, suirirena ñokuna ñañu chini.

19 Chũ'ũ chiinare ũcuanʉkore cu'ache cho'ochete ũhasõ re'oja'che paapũ chini rʉa i'kakũ cu'ache ti'jñeñe cho'okũ'mʉ chũ'ũ, repanapi re'oja'che pa'ima'to. Jã'ajekuna mʉsanʉkona chũ'ure jmamakarũ cuasajũ pa'iche'te ũhasõ jo'e chũ'ũni na'a rʉa cuasajũ pa'ijũ'ũ.

20 Asarepajũ'ũ. Chu'ũ musanukonare vũ'ena rani jatisa'aro'te nukaku soicheja'che soiu pa'imũ. Jã'aja'ñe chu'upi soiuna pãiu ũcuauakũji asa jatisa'aro vatacheja'che chu'uni na'a rua cuasato vũ'ena kaka pũũ ũcuauana'me ãu ãiñeja'ñe repau rekocho'te ja'me pa'iu sãiñechi'a pojojũ pa'ijanaa'me chũkũna.

21 Chu'ũre cuhenare cajejani Ja'ku chũ'ũku ñu'isaivũ kueñe pũũ ja'me ñu'iu chũ'ũku'mũ chu'ũ. Chu'ũni cuasaju cu'ache cho'ocojñonata'ni chu'ũre cuasache ũhasõmanesinare chu'ũ ũcuaja'che repanare chu'ũ chũ'ũku ñu'isaivũ kueñe pũũ ñu'iju chu'ũna'me chũ'ũajũ chini jo'kaja'mũ.

22 Chu'ũre cuasakuanupũãre Dios Rekocho i'kache asa chẽa cho'oũana ũcuauũko asa chẽajũ'ũ, chiisi'kũa'mũ Jesucristo.

4

Cũnaũmũ cana Diore pojojũ re'oja'che i'kache'te kũamũ

1 Jã'aja'ñe cho'ocuhasiũmũ cũnaũmũ ñato jatisa'aro vatasisa'aro pa'isi'kũa'mũ. ũcuachi'a aperũmũ chu'ũre trompetavũ juhijũna asocheja'che rua asoche i'kasi'ku jo'e ija'che i'kasi'kũa'mũ: "Ichejana mũijũ'ũ. Na'a pa'isiriũmũ ti'jñejañere mũ'ũni ñora", chiisi'kũa'mũ.

2 Reparũmũ chu'ũre Dios Rekochoji cho'okaũana ñaku cũnaũmũ Repau pa'icheja

pāi chũ'una ñu'isaivũ Ñu'ikuni ñasi'kua'mũ
chũ'u Repaũ'te Diore.

3 Repasaivũ ñu'ikũ jaspe catapũã
pachoko'sija'icheja'che ko'sija'iuũ ũcuachi'a
cornalina cata maako'sijapũãja'ñe ko'sija'iuũ
ñosi'kua'mũ chũ'ure. Repaũ ñu'isaivũ
ũcuachi'a ma'ñarekovũ esmeralda cata
vĩjako'sija'icheja'che ko'sija'ivũji rũhiso'koro
pa'isi'kua'mũ.

4 Ũcuachi'a chekusaiivũã veinticuatrorepa-
saiivũã repasaivũ pa'iche rũhiso'koro
pa'isi'kua'mũ. Ũcuasaivũãre aina
veinticuatrorepana ñu'isinaa'me. Kãña
pojakãñare ju'iju tuhivũã pachokurivũãre tuhiju
ñu'isinaa'me repana ũcuanũko.

5 Ũcuachi'a Dios ñu'isaivũ rũichejapi fe'nekũ
rũa asoche curusi'kua'mũ. Ũcuachi'a repa-
saiivũ ti'jñe'ne'te uoñoã pa'isaivũã sieterepa-
saiivũã nukakũ uukũ pa'isi'kua'mũ. Jã'asaivũã
sieterepasaivũã Dios Rekochoja'chea'me.

6 Ũcuachi'a repasaivũ ti'jñe'ne'te mar-
chiaraja'chepi joicũna ko'sija'iuũ etajaiche
ñoñeja'ñe pa'isi'kua'mũ. Ũcuachi'a repasaivũ
rũichejare vajupāi ũcuaka'chapana repana
ca'nivũãre si'acaca'nivũã tijñapa cakã'jñona'me
cho'je cakã'jño ñakocaã paanapi si'acakã'jño
pa'isinaa'me.

7 Repana vajupāi te'eũ león chaija'iuũ
pa'isi'kua'mũ. Chekũ toroja'iuũ pa'isi'kua'mũ.
Chekũ pāi chia paasi'kua'mũ. Jo'e chekupĩ tao
cãva ku'ikũja'iuũ pa'isi'kua'mũ.

8 Repana vajupāi kue'chaka te'eũ

seirepakachi'a paasinaa'me. Ūcuakare ñakocaã paasinaa'me repaña vü'evüãna'me sē'sevüã. Ūcuachi'a jmakarüjē'e cuhama'ñe umucusena'me ñami ija'che i'kajü pa'isinaa'me repaña:

Re'okü'mü Dios.

Re'okü'mü Dios.

Re'okü'mü Dios.

Peore Masü'mü Repañ.

Irumüjē'e pa'ia chuta'a cheja cho'omarumüjē'e pa'ikü'mü Repañ.

Ūcuachi'a si'arumü pa'ikü'mü Repañ,
chiijü pa'isinaa'me repaña.

⁹⁻¹⁰ Repañ'te Diore Si'arumü Pa'ikü'te ñu'isaivü ñu'iküni repaña vajüpäi pojojü re'oja'chere ija'che i'kasinaa'me: "Peore Masü'mü mü'ü. Peore re'oja'che cho'okaiküjeküna, 'Re'orepamü', chiime chüküna mü'üre", chiisinaa'me. Jã'aja'ñe i'kato aina veinticuatrorepaña Dioni pojojü Repañ'te ti'jñeñe ro're püü ñu'ijü ücuachejana repaña tuhivüã t'ite üha ija'che i'kasinaa'me:

¹¹ Dios, Chüküna'te Paakü, mü'üpi chiü cho'öña peore si'ache pa'imü.

Mü'üpi cho'oma'to peora'amü jã'a.

Jã'ajeküna päi ücuanüko mü'üni cuasajü pojojü,
"Peore Masü'mü mü'ü.

Peore re'oja'che cho'okaikü'mü.

Peore chü'ükü paañ", chiijü paapü,
chiisinaa'me repaña.

5

*Utija'okorovũ chũ'o tochasi'e pa'ikororũ
pa'ichena'me Jesucristo Ovejachũija'iu pa'iche'te
kuamũ*

1 Ũcuarũmũ chũ'u ñato Dios, ñu'isaivũ'te
ñu'iu Repaũ ujjajũture utija'okorovũ
sa'navũna'me sũ'sevũ chũ'o tochasi'e
pa'ikorovũ'te cãjikũ ñu'isi'kuã'mũ.
Ũcuachi'a repakorovũji koromanea'ku
chini je'nasimajñarũã sieterepamajñarũã
pa'isi'kuã'mũ.

2 Ũcuarũmũ chũ'u ángel'te rũa masiũni
ñasi'kuã'mũ. Ũcuauji rũa ujjachũ'opi, "¿Neepi
repakorovũ je'nasimajñarũã vato korajanaa'ñe?
Rũa Re'okuchi'a cho'ochẽ'me jã'a", chiisi'kuã'mũ.

3 Jã'ata'ni repakorovũ je'nasimajñarũã
vato kora ñamasina te'eujẽ'e peosinaa'me
cũnaũmũna'me chejana'me jũ'isina pa'icheja.

4 Repakorovũ kora ñamasikũni jñaamanerena
rũa oiche oisi'kuã'mũ chũ'u.

5 Jã'ata'ni aina chũ'upi oiũna asa te'eũ
chũ'ure ija'che i'kasi'kuã'mũ: "Oimanejũ'ũ. Ju-
davãjuũji aperũmũ pa'isi'ku David Jojosi'kupi
león chaija'che Pa'ikũji Repaũ'te cuhenare Ca-
jejaisi'kũjekũ repakorovũ je'nasimajñarũã si-
eterepamajñarũã peore vato kora ñare'omũ
Repaũ'te", chiisi'kuã'mũ.

6 Ũcuarũmũ chũ'u ñato Dios ñu'isaivũ
rũicheja vajũpãina'me aina pa'icheja
chenevũ'te Jesucristo Dioni ĩsijũ ove-
jachũi Vanisõcojñosi'kũja'iuji vajũraisi'ku
pa'isi'kuã'mũ. E'chosẽ'ña sieterepasẽ'ña paakũji

ñakocaã sieterepañakocaã paasi'kua'mu Repau.
 Repau ñakocaã sieterepañakocaã Dios Rekocho
 re'oja'che Cho'okairekochoji cheja si'achejña
 saocojñosirekochoja'chea'me.

7 Ūcuarumu Repau Ovejachīija'iu sani
 repasaivu Ņu'iku Dios ujajutu cājikorovu
 utija'okorovu koosi'kua'mu.

8 Jā'aja'ñe repakorovu'te koouna ña
 vajupāi ūcuaka'chapanana'me aina
 veinticuatrorepana Ovejachīija'iu Jesucristo
 ti'jñeñena tāni puu ro're ñu'isinaa'me. Repana
 ūcuanku arpaũana'me coparo'rovaã pa-
 chokuriro'rovaãpi vi'toma'ña timusiro'rovaãre
 cājisinaa'me. Repa vi'toma'ña Dios neena
 Repau'te sēeñeja'ñea'me.

9 Ro're ñu'ijū uja mamare ija'che ujasinaa'me
 repana:

Chuenisōsi'kua'mu mu'u.

Chuenisō mu'u chiepi pāi cu'ache cho'oche
 ro'ikaisi'kua'mu mu'u,
 pāipi si'achejña pa'inana'me si'ache chu'o
 i'kanana'me si'avājū Dios neenachi'a
 paaru chini.

Jā'aja'ñe cho'osi'kujekuna ikorovu
 je'nasimajñaruã vato ñare'omu mu'ure.

10 Ūcuachi'a mu'upi jo'kauna mu'u neena,
 phairipāi Diore cho'okaicheja'che
 cho'okaijū pa'ijanaa'me.

Ūcuachi'a chejare pa'ijū pāire chekunani
 chū'ujū pa'ijanaa'me repana,
 chijū ujasinaa'me repana.

11 Jā'a cho'ocuharumu ñato Dios
 ñu'isaivū rūicheja vajupāina'me aina

pa'ichejare si'acakã'jño ángeles jairepanukojeju
kuẽkuecu'anuko pa'ijuna repaña i'kache chũ'o
asasi'kua'mũ chũ'ũ.

¹² Rũa Ƶjachũ'opi ija'che i'kasinaa'me repaña:
Ikũre Jesucristo'te ovejachĩiva'ũ
cho'ocojñoñeja'ñe

pãĩ ũcuanũko cu'ache cho'oche'te ro'ikasa chini
chueni jũni ro'ikaisi'kũjekũna

pãĩ ũcuanũko Repaũni pojojũ ija'che
i'kajanaa'me:

“Peore si'ache re'oja'che chũ'ũkũ paakũ'mũ
mũ'ũ.

Peore masikũ'mũ.

Mũ'ũre cuasajũ vajũchũnaa'me chũkũna.

Mũ'ũ cho'ora chiiche peore cho'omasikũ'mũ
mũ'ũ.

Pãĩ ũcuanũko mũ'ũni pojojũ re'oja'che i'kajũ
paapũ”, chiijanaa'me,
chiisinaa'me repaña.

¹³ Jã'a cho'ocuhasiřũmũ jo'e chekere ñakũ
Dios cho'osina ũcuanũko, cũnaũmũ pa'inana'me
cheja pa'inana'me jũnisõsina pa'icheja
canana'me chiacha pa'iva'na i'kachũ'ore ija'che
i'kache'te asasi'kua'mũ chũ'ũ:

Diore ñũ'isaiivũ ñũ'ikũ'te pãĩ ũcuanũko pojojũ
si'arũmũ ija'che re'oja'che i'kajũ paapũ,

Ovejachĩija'ia'te Jesucristo'te ũcuachi'a:

“Pãĩ ũcuanũko mũsanũkonare cuasajũ
vajũchũa'jũ.

Peore masijũ, peore chũ'ũnaa'me mũsanũkona”,
chiijũ paapũ,
chiisinaa'me.

14 Jã'aja'ñe i'karena asa vajupãi, "Jã'aja'ñe paau", chiisinaa'me. Ainapi ro're paa ñu'ijũ Diore Si'arumũ Pa'ikũni pojosinaa'me.

6

Utija'okorovũ sieterepamajña je'nasi'e pa'ikorovũ vato ñasi'ere kũamũ

1 Ũcuarumũ chũ'ũ ñato Ovejachĩija'iu Jesucristo utija'okorovũ je'nasimajñarũã te'emaka vatosi'kũa'mũ. Vatouna vajupãi te'eũ, "Raijũ'ũ", chiisi'kũa'mũ chũ'ũre. Repaũ i'kache oko curucheja'che asosi'kũa'mũ chũ'ũre.

2 Jã'aja'ñe i'kaũna asa kavacho'te poja'ĩuni ñasi'kũa'mũ chũ'ũ. Repava'ũre tuhikũ saocupupũ cãjisi'kũa'mũ. Ũcuarumũ kavacho'te tuhikũ repaũni tuhivũ'te ĩsirena sanisõsi'kũa'mũ, repaũ'te cuhenani cavakũ cajejasa chini.

3 Ũcuarumũ Repaũ Jesucristo chekũmakare vatouna vajupãi chekũ chũ'ũre, "Raijũ'ũ", chiiche asasi'kũa'mũ chũ'ũ.

4 Jã'aja'ñe i'kaũna asa ñato chekũ kavacho maaja'ĩaji raisi'kũa'mũ. Rakũna Dios repaũ'te tuhũũ raisi'kũre cu'ache cho'omasiche'te jo'kasi'kũa'mũ, pãire repaũ sãĩnechi'a re'oja'che pa'iche'te sani ũsekũna, repaũni cavajũ sãĩnechi'a vanisõa'jũ chini. Ũcuachi'a Dios repaũ'te va'ti rũũ ujava'tire ĩsisi'kũa'mũ.

5 Ũcuarumũ Repaũ Jesucristo jo'e chekũmakare vatouna vajupãi chekũ chũ'ũre, "Raijũ'ũ", chiiche'te asa kavacho'te chija'ĩuni

ñasi'kua'mu chu'u. Repava'ure tuhiku ruesomaka cãjisi'kua'mu.

6 Ūcuarumu chu'u vajupãi ũcuaka'chapana pa'icheja chenevũji chu'o i'kache asasi'kua'mu, ija'che chiiche'te: “Au jmarepanukorujeku rua ro'imu. Denario kuri te'ere'reva te'eumucuse cho'oche cho'o koochenukoru trigo te'ekilo ro'imu. Cebada chotekilo ũcuajanuko ro'imu. Jã'amajñarũãre ruarepa ro'iche'te kooto kurire si'asõrena u'chape'ejẽ'e conojẽ'e koocu'aja'mu pãi.”

7 Ūcuarumu Repau Jesucristo jo'e chekumakare vatõna vajupãi jo'e cheku chu'ure, “Raijũ'u”, chiiche asasi'kua'mu chu'u.

8 Jã'aja'ne i'kauna asa ñato kavacho pachojajũũruji raisi'kua'mu. Repau'te tuhiku mami, “Jũnisõne”, ve'esi'kua'mu. Repau cho'jepi cheku raisi'kua'mu. Repau mami, “Jũnisõsina pa'icheja”, ve'esi'kua'mu. Ratena Dios repanare ija'che cho'omasiche'te chũ'u jo'kasi'kua'mu: “Cheja pa'inare pãi jainukore sani vanisõjũ'u musanukona. Chekunare jainukore vajñapi vanisõjũ'u. Chekunare ãucuhana jũnisõa'ju chini repana ãu kũĩne'te ũsejũ'u. Chekunare ravu cho'ojũ'u, ravuna jũnisõa'ju. Jo'e chekunare cu'ava'napi kokaneeju kũku vẽasõne chũ'ujũ'u.” Jã'aja'ne cho'omasiche'te chũ'u jo'kasi'kua'mu Dios repanare.

9 Ūcuarumu Repau Jesucristo jo'e chekumakare vatõna ñaku Dios chu'o chu'vaju Jesucristo pa'iche kuaju chuenisõsina rekoñoãre ñasi'kua'mu chu'u. Diore ñsimajñarũã tão

uoko'a vu'evu'te pa'isi'kua'mu repana rekoñoã.

10 Ūcuarumu repana Dios chu'o kuaju chuenisōsina ujachu'opi ija'che i'kasinaa'me Repau'te: “Dios, Peore Chũ'uku, rua re'oku'mu mu'u. Mu'u cho'ora chiiche ũcuarepa cho'oku'mu. ¿Jeerumu mu'u, chukuna'te vanisōsinare repana cho'osi'e ro'iche chũ'uja'u, chukuna'te vanisōsi'ere ro'ia'ju chini?”, chiisinaa'me repana.

11 Chitena Dios repanare ũcuanakore kãña pojakãñapi ujacueñoãre ĩsisi'kua'mu. ĩsicuha repanare i'kasi'kua'mu Repau. “Musanukona Jesús neenajeju Repauni cuasaju chuenisōsi'ēja'che chekuna Repau'te cuasana ũcuaja'che chuenisōjanaa'me. Jmamaruchi'a oima'ñe cha'ajũ'u musanukona, repana chuenisō musanukonana'me chi'irumujatu'ka”, chiisi'kua'mu.

12 Ūcuarumu Repau Jesucristo jo'e chekumakare vatouna ñaku cheja rua pi'ruchejare ñasi'kua'mu chu'u. Jã'aja'ñe pi'rukuna kãa chijakãaja'ñe chija'iu ñosi'kua'mu ũsuu. Pãimiau ũcuachi'a peore si'acaku chieja'che maaja'iu ñosi'kua'mu.

13 Jã'a cho'oto ma'jñoko higura'puruã vĳjara'puruã ruarepa tutakuna tuã'tuacheja'che cunaumupi chejana tuã'tuasinaa'me.

14 Cunaumu ũcuachi'a utija'ova ca'nesōñeja'ñe si'asōsi'kua'mu. Ūcuachi'a aikũjña si'acakũjña juupoãna'me peore rupu tũichejñana kuñocojñosi'kua'mu.

15 Jã'a cho'oto cheja pa'ina, pãi jainakore

chũ'una, chekuna pãi chũ'unana'me sōtaopãi chũ'unana'me kurinana'me kokanana'me cho'ochete rupũ cho'okaaru chini chẽa paacojñova'nana'me chekuna paacojñomana ũcuanuko aikũjña caripaã cacojñana vajuchujũ kaka katisōsinaa'me. Chekuna te'ena repakũjña vœ'evũã pa'iruã catarũã vœ'evũna katisōsinaa'me.

¹⁶ Jã'aja'ñe katisō aikũjñana'me catarũãre ija'che i'kasinaa'me repana: “Chukuna katisichejña ti'jñeñe ñaña tuã'tua ta'pisōjũ'ũ, Diopi Repau ñu'isaivũji ñu'iu chukuna'te Ñakũji ñamanea'ku. Ũcuachi'a Ovejachĩija'iaji Jesucristoji chukuna'te cu'ache Cho'ojaupi jñaamanea'ku”, chiisinaa'me repana.

¹⁷ Dios Repau Mamakuna'me pãi ũcuanukore repana cu'ache cho'osi'e ro'i ro'ia'jũ chini chũ'uumucuse tĩ'acuhamũ. Repaumucuse pãi ũcuanuko repana cu'ache cho'osi'e ro'i ro'ijanaa'me.

7

*Aperumũ pa'isi'ku Israel tamachĩi
jojocojñosinani Dios mami repana chiarũãna
tochacojñosinani i'kamũ*

¹ Jã'aja'ñe cho'ocuhasirumũ ángeles ũcuaka'chapanare cheja si'acakã'jño nukanani ñasi'kuamũ chu'ũ. Co'covũ cakã'ko nukaku repakã'ko tutache'te ũsesi'kuamũ. Cheku suripũ cakã'ko nukaku ũcuachi'a repakã'ko tutache'te ũsesi'kuamũ. Cheku ũsũũ muicheja cakã'ko nukaku repakã'ko tutache'te ũsesi'kuamũ. Jo'e cheku ũsũũ na'ikã'ko nukaku ũcuachi'a

repakã'ko tutache'te ãsesi'kua'mu. Jã'aja'ñe nukaju tuta ãsejuna chejana'me mar chiara sã'sevuãjẽ'e tutamau si'ache sũki ja'o te'eja'ovajẽ'e tuta ñu'kuemanesi'kua'mu.

² Ũcuarumu chekure ángel'te ãsuu maichejapi Dios, Si'arumu Pa'ikũ mamimaka tochasimakare cãjiku raiuna ñasi'kua'mu chu'u. Rani chekunare ángeleva'nare ũcuaka'chapanare chejana'me mar chiara cu'ache cho'oa'ju chini chũ'u raocojñosinani ujachu'opi ija'che i'kasi'kua'mu repau:

³ “Chuta'a chejana'me mar chiarana'me sũkiñuã cu'ache cho'omanejũ'u, Dios neenare repaña chiapũãna Repau mami chukuna tocha pi'nisirumujatu'ka.”

⁴ Ũcuarumu chu'o ija'che i'kache'te asasi'kua'mu chu'u: “Repaña chiapũãna Dios mami tochacojñosina peore ciento cuarenta y cuatro milrepanaa'me. Aperumu pa'isi'ku Israel mamachĩ docerepana jojosinaa'me repaña.

⁵ Ijanũkoa'me repaña, Dios mami repaña chiapũãna tochacojñosina:

Judá jojosina doce milrepanaa'me.

Rubén jojosina doce milrepanaa'me.

Gad jojosina doce milrepanaa'me.

⁶ Aser jojosina doce milrepanaa'me.

Neftalí jojosina doce milrepanaa'me.

Manasés jojosina doce milrepanaa'me.

⁷ Simeón jojosina doce milrepanaa'me.

Leví jojosina doce milrepanaa'me.

Isacar jojosina doce milrepanaa'me.

⁸ Zabulón jojosina doce milrepanaa'me.

José jojosina doce milrepanaa'me.
Benjamín jojosina doce milrepanaa'me,
repana chiapũãre Dios mamí paana”, chiiche'te
asasi'kua'mũ chu'ũ.

Pãĩ jainũko pojakãña ju'ina pa'iche'te kuamũ

⁹ Jã'aja'ñe i'kache asacuharũmũ ñakũ
pãĩ si'achejña canapi tĩichũ'ochi'a cutunapi
te'ejẽ'e kuẽkuecu'anũko Dios ñu'isaivũna'me
Ovejachĩija'ia Jesucristo pa'icheja ti'jñeñe
pa'inani ñasi'kua'mũ chu'ũ. Kãña pojakãñari
ũjacueñoãre ju'ijũ pũtijoo cãjisinaa'me repana.

¹⁰ Ũcuarũmũ ija'che i'kajũ ẽjachũ'opi cuisinaa'me repana: “Maire Paakũ, ñu'isaivũ Ñu'iku Diona'me Ovejachĩija'ia Jesucristo chẽa paame maire, re'oja'che pa'ijũ vati toana saimanea'jũ chini”, chiisinaa'me.

¹¹⁻¹² Jã'a cho'oto ángeles ũcuanũko Dios ñu'isaivũna'me ainana'me vajũpãĩ ũcuaka'chapana pa'icheja rũhiso'koro nukasinaa'me. Nũkasinapi repasaivũ ti'jñeñe ro're pũũ sime ñu'ijũ Dioní pojojũ ija'che i'kasinaa'me repana:

jã'aja'ñe paaũ!

Maire Paakũ'te Diore si'arũmũ re'oja'che ija'che i'kajũ pojojũ pañu mai:

“Rũã re'okũ'mũ mũ'ũ.

Peore masikũ'mũ.

Peore re'oja'che cho'okaikũjekũna mũ'ũre, Re'orepamũ”, chiinaa'me chũkũna.

Mũ'ũre cuasajũ vajũchũnaa'me chũkũna.

Peore chũ'ũkũ'mũ mũ'ũ.

Mũ'ũ cho'ora chiiche peore cho'omasikũ'mũ mũ'ũ.

jĴā'aja'ñe paau!
chiisinaa'me repaana.

¹³ Ũcuarũmu aina, te'eũ ija'che sēesi'kua'mũ
chũ'ũre:

—¿Ina pojakãña ju'ina jeejanaa'ñe? ¿Jeeche-
japi ina rate? —chiisi'kua'mũ.

¹⁴ Chikũna, chũ'ũ,

—Masimũ mu'ũ —chiisi'kua'mũ. Chikũna
repaũ ai ija'che i'kasi'kua'mũ chũ'ũre:

—Pãi ũcuanũkore rua cu'ache ti'jñerũmu
pa'isinata'ni Diore cuasache ũhasõmanesinajeju
Ovejachĩija'ia Jesucristo chiepi kãña meno
peokãña choasõñeja'ñe repaana rekoñoã cu'ache
cho'osi'e tũnosõcojñosinajeju re'oja'che pa'ime
ina.

¹⁵ Jã'aja'ñe pa'inajeju Dios pa'ichejare chũ'ũku
ñu'isaivũ ti'jñeñe'te pa'ijũ umucujñana'me
ñami Repaũ'te cho'oche cho'okaiju pa'ime
repaana. Dios ñu'isaivũ Ñu'ikũji repaana oia
cu'ache ti'jñeñe ũsekaija'mũ.

¹⁶⁻¹⁷ Ũcuachi'a Dios ñu'isaivũ ti'jñeñe
Pa'ikũji Ovejachĩija'ia Jesucristoji repaana
ovejaja kuirakũ cho'ocheja'che repaana
kuiraja'mũ. Jã'ajekũna repaana jo'e
ãucuhameja'mũ. Ũcuachi'a jo'e sumava'na
pa'imanejanaa'me repaana, Diona'me Jesucristo
jã'aja'ñe cho'okatena. Ũcuachi'a jo'e
okouamaneja'mũ repaana. Ũsuũ asuche
jo'e uujũ phã'phamanejanaa'me repaana —
chiisi'kua'mũ repaũ.

8

Je'nasimajña cuhacho camaka vatosi'ena'me pachokuro'rova ma'ña pa'iro'rova pa'iche'te kuamũ

¹ Ūcuarũmũ Ovejachĩija'iu Jesucristoji utija'okorovũ je'nasimajña cuhacho camakare vatouna cunaũmũ Dios pa'icheja media hora i'kamacheja pa'isi'kua'mũ.

² Jã'aja'ñe cho'ocuhahirũmũ ángeleva'nare sieterepanare Dios chũ'ukũ ñu'isaivũ ti'jñeñe nukanani ñasi'kua'mũ chu'ũ. Nũkajũ trompetavũã te'evũãchi'a ĩsicojñosinaa'me repaña.

³⁻⁴ Ūcuachi'a chekũre ángel'te pachokuri cunaro'rova cãjikũ rani mesako'a ma'ña uoko'a pachokuri cho'osiko'a ti'jñeñena canũkaũna ñasi'kua'mũ chu'ũ. Canũka nukakũ vi'toma'ña rũa ĩsicojñosi'kua'mũ repaũ, ũcuako'ana repa ma'ñare tuo uokũna vi'toma'ñapi uukũ piko mũiuna Dios neena Repaũ'te sēeñe ma'ña pikona'me Dios pa'ichejana mũisi'kua'mũ.

⁵ Ūcuarũmũ repaũ ángel mesako'a pa'itoa toa mini reparo'rovana timuñe ma'ña chejana pãĩ pa'ichejana tōsi'kua'mũ. Tōũna cheja fe'nekũ rũa asoche curukũ pi'rusi'kua'mũ.

Trompetavũã'me

⁶ Jã'aja'ñe cho'okũna repaña ángeles sieterepana trompetavũã paana juhupi'rasinaa'me.

⁷ Ūcuarũmũ ángel te'eũ charo repaũ trompetavũ juhisi'kua'mũ. Jukũna oko rũhicaãpi toana'me chie ja'mesicaãpi chejana tuã'tuasi'kua'mũ. Tuã'tuaũna chejana'me sũki

joopojakã'ko uusõsi'kua'mu. Tachata'ni peore uusõsi'kua'mu.

⁸ Ūcuarumu jo'e chekupi ángelpi repau trompetavute jukuna, aikūtijamakapi uumakare mar chiarana su'a r̄uona repara chiara joopojakã'ko chie carūnisõsi'kua'mu.

⁹ Chie carūkuna repara chiara pa'iva'na ūcuachi'a jainuko jūnisõsinaa'me. Barcovã ūcuachi'a repara ku'isivã joopo ñañasõsi'kua'mu.

¹⁰ Jã'a cho'ocuhauna jo'e cheku ángelpi repau trompetavute jukuna Ɂjama'jñoko cunaumupi uopɁja'che ñoɁ uuku tuã'ia pu'chu chiañaãjẽ'e joopo oko punijẽ'e joopo tuã'tuasi'kua'mu.

¹¹ Repau ma'jñoko tuã'isiñaã chiañaã pa'ichena'me oko puni oko kaja'che carūnisõsi'kua'mu. Jã'aja'ñe okopi kaja'ina pa'i jainuko ūku jūnisõsinaa'me. Repau ma'jñoko mami, "Kaja'chea'me".

¹² Jã'aja'ñe cho'ocuhasirumu jo'e chekupi ángelpi repau trompetavute jukuna ūsu miañe joopo chachasõna chija'isi'kua'mu. PãimiaɁ ūcuachi'a miañe joopo chachasõ miamanesi'kua'mu. Ma'jñokova'na ūcuachi'a joopo miamanesinaa'me. Jã'aja'ñe cho'ocojño ūsu umucuse ūcuaka'chapahora miamanesi'kua'mu. Pãimiauna'me ma'jñoko ūcuachi'a ūcuaka'chapahora ñami miamanesinaa'me.

¹³ Jã'a cho'ocuhauna jo'e ñaku tao cunaumure cãva ku'ia Ɂjachu'opi cuiku ija'che i'kakuni asasi'kua'mu chu'u: "¡Rua cu'ache! ¡Rua cu'ache! Chekuna ángeles chotena repana

trompetavũã chuta'a juhimanapi jutu rua cu'ache ti'ñeja'mũ pãi cheja pa'inare", chiiũ cuisikua'mũ repaũ.

9

¹ Jã'aja'ñe cho'ocuhasirũmũ jo'e chekũ ángelpi repaũ trompetavũte jukũna ma'jñoko'te cunaũmũpi chejana tuã'iana ñasi'kua'mũ chu'ũ. Tuãni llavemakare vati pa'icoje tũsojamakare ïsicojñosi'kua'mũ repaũ.

² Repamaka koo ũcuamakapi repacoje jaosi'e tũso vataũna ũcuacoje sa'navũji piko toa ujatao uuku rua piko mũĩñeja'ñe mũisi'kua'mũ. Pikopi ruarepa mũiũna ũsũna'me cunaũmũ ta'pisõsi'kua'mũ.

³ Jã'aja'ñe cho'okũna pũ'suva'na piko sa'navũji eta chejana cajesinaa'me. Caje pa'ijũ puniva'na totacheja'che totamasiche jo'kacojñosinaa'me repana pũ'su.

⁴ Repanare jã'aja'ñe cho'omasiche jo'kasi'kũ ija'che chiiũ chũ'ũ jo'kasi'kua'mũ: "U'chana'me sũki cu'ache cho'omanejũ'ũ mũsanũkona. Pãita'ni repana chiapuãre Dios mami tochasi'e peonarech'i'a cu'ache cho'ojũ'ũ.

⁵ Cincorepapãimia pãire asi cho'ojũ pa'ijũ'ũ. Jã'ata'ni repanare asi cho'o vẽasõmanejũ'ũ", chiisi'kua'mũ repaũ. Chikũna repana pũ'su punirepa totajũ asi cho'ocheja'che pãire asi cho'osinaa'me.

⁶ Jã'aja'ñe cho'ojũna pãi cho'o jũnisõũ chini si'ache cho'onata'ni cho'ote'esinaa'me. Jũnisõũanareta'ni jũ'iñe tĩ'amanesi'kua'mũ repanare.

7 Repana pũ'suva'na kavacho pãi vai saipi'rajũ care'vacojñosiva'naja'ñe ñosinaa'me chũ'ure. Sijore pachokurivũãja'ñe tuhivũã tuhisinaa'me repana. Chiña pãi chiñaja'ñe paasinaa'me repana.

8 Ũcuachi'a raña romi rañapaãja'ñe paanapi cõji chai cõjija'ñe paasinaa'me repana.

9 Repana ã'capuã sõtaopãi asi cho'ocojñoñe'te cuhejũ cunakãña tũiñeja'ñe tũisinaa'me repana. Ũcuachi'a repana kue'chaka pãuñe, carrosai kavacho jñajñusaipi pãi vai saijũ vũ'vũjuna asocheja'che asosi'kua'mũ.

10 Repana puni jĩkoñoãja'ñe paache cin-coreparãimiachi'a pãire asi cho'ore'osi'kua'mũ repañare.

11 Repanare pũ'suva'nare chũ'ũkũ ángel chekũnare repacoje pa'inare ũcuachi'a chũ'ũkũ'mũ. Repau mami "Abadón" chiimũ hebreo chũ'o. Griego chũ'ota'ni "Apolión" chiimũ repau mami.

12 Charo ti'jñeñe cu'a, cho'o caran-icuhasi'kua'mũ. Jã'ata'ni chuta'a ka'chañoã jo'e cu'ache ti'jñeja'ñe karamũ.

13 Ũcuarũmũ jo'e chekũpi ángelpi repau trompetavũ'te jukũna Diore ti'jñeñe rũiko'a Repau'te ĩsimajñarũã ma'ña tũo uoko'a pachokuriko'acasẽ'ña e'chosẽ'ña ũcuaka'chapasẽ'ña nukachejñapi chũ'o i'kache asasi'kua'mũ chũ'u.

14 Repa chũ'o i'kakũ ángel'te trompetavũ juhisi'kũre ija'che i'kasi'kua'mũ: "Ángeles ũcuaka'chapanare chẽa Eufrates ujaça

chiacha ru'tuvana quëo sucojñosiva'nare jose etojaijũ'u", chiisi'kua'mu.

15 Chikuna repau ángel asa sani repanare jose etosi'kua'mu, pãi jainukore jña'nu vanisõa'ju chini. Repana jã'aja'ñe cho'ojarumu aperumuna care'va jo'kaasomu Dios, repa horana'me repa umucusena'me repa ùsurumu.

16 Ûcuarumu chu'u ángeleva'nare jose etosirumu repanare ja'me cho'okaijanare sõtaopãi kavacho tuhinare kuëkuesinako ija'che i'kache'te asasi'kua'mu: "Sõtaopãi, kavacho tuhina doscientos millonerepanaa'me", chiiche'te.

17 Dios ñoñe'te chu'u ñato repana kavacho tuhina ija'che paasinaa'me: Repana ã'capuã asi cho'ocojñoñe'te cuheju cunakãña tũisinaa'me repana. Chekuna maajakãñare tũisinaa'me. Chekuna ra'sojakãñare, chekuna pachojakãñare tũisinaa'me. Kavachova'na ùcuachi'a repana sijo león chai sijoja'ñe paasinaa'me. Repana chu'opoãpi toñana'me pikona'me azufre rua cu'asucheji etasi'kua'mu.

18 Kavacho repana chu'opoã etacheji chotemajñapi cu'acheji pãi jainukore vanisõsinaa'me toñana'me pikona'me azufre rua cu'asucheji.

19 Repana chu'opoã etachena'me repana jikoñoãpi pãi vanisõsinaa'me. Repana jikoñoã ãña sijoja'ñere paaju ùcuañoãpi pãi kuku vëasõsinaa'me repana.

20 Jã'ata'ni pãi chekuna vanisõcojñomanesina repana cu'ache cho'ojũ pa'iche ùcua

ũhamanesinaa'me. Ũcuachi'a vatire pojoche ũhamanesinaa'me. Ũcuachi'a rupũ tũosiva'nare, "Dioa'mũ iku", chiicojñova'nare pojoche ũcua ũhamanesinaa'me repaña. Repaña tũosiva'na pachokuripi cho'osiva'naa'me. Chekurũmũ pokuripi chekurũmũ pachocũnapi chekurũmũ catapi chekurũmũ sũkipi cho'ocojñosiva'naa'me repaña. Cãjo paame repaña'na. Jã'ata'ni asamanaa'me. Ñakocaã paame. Jã'ata'ni ñamanaa'me. Ũcuachi'a cũ'a paame. Jã'ata'ni ku'ima'me.

²¹ Ũcuachi'a repaña vanisõcojñomanesina repaña pãi vanisõñe chaina cho'ochena'me repañare pa'imanare romi ja'me kãijũ ũcuaũanare ja'me kãĩñena'me põse ñaañe ũcua ũhasõmanesinaa'me repaña.

10

Angel utija'okororũ chũ'o tochasikororũ paakũ cho'osi'ere kũamũ

¹ Jã'aja'ñe cho'ocuhasirũmũ jo'e chekũre ángel'te rũa masiũji cũnaũmũpi piko sa'navũji cajekũna ñasi'kũa'mũ chũ'ũ. Repañ sũjorũ sũ'sevũ'te ma'ñarekovũ tuhiũ cajesi'kũa'mũ repañ. Repañ chia ũsũũ miañeja'ñe ko'sija'isi'kũa'mũ; cũ'a toaja'che paasi'kũa'mũ.

² Utija'okororũ korasikororũ'te cãjikũ caje, repañ ẽjacũ'arũji mar chiarana tumukũ kã'kocũ'arũ'te chejana tumu canũkasi'kũa'mũ repañ.

³ Canũka nũkakũ león chai rũa asoche oicheja'che rũa cuikũ i'kasi'kũa'mũ repañ. Cuikũ

i'kacuhauna oko curucheja'che rua asoche i'kana sieterepana repa ch'u'opi i'kasinaa'me.

4 Jã'aja'ñe i'karena asa repa i'kasi'e utija'ovana tochapi'rasi'kua'mu chu'u. Tochapi'rakujì cunaumupi chu'o ija'che i'kache'te asasi'kua'mu chu'u: “Mu'u asasi'e chekúnare kuamanejũ'u; ũcuachi'a tochamanejũ'u repa”, chiiche'te.

5 Ūcuarumu repaũ ángel chu'u ñasi'ku mar chiarana'me cheja tumu nukaku repaũ uajãtu cunaumuna muñe ñu'osi'kua'mu.

6 Ñu'o nukaku cunaumuna'me chejana'me mar chiarana'me repachejña pa'imajñaruã si'ache cho'osi'ku Dios Si'arumu Pa'iku mamire ve'oku ija'che i'kasi'kua'mu repaũ: “Dios ñaku'te ija'che i'kamũ chu'u: Repaũ cho'ora chiiche na'a jeerumu cha'ache peoja'mu maire, chiimu chu'u”, chiisi'kua'mu repaũ.

7 Angeles seirepana trompetavã junicuharena jo'e cheku juhipi'ratona Dios Repaũ, “Cho'oja'mu chiisi'e”, Repaũchi'a masiche'te cho'oja'mu. Aperumu Dios Repaũ chu'o kuanarechi'a kuaasomu jã'a.

8 Ūcuarumu cunaumupi i'kakuna chu'u asasi'ku jo'e ija'che i'kasi'kua'mu chu'ure: “Angel'te mar chiarana'me cheja tumu nukaku cãjikororũ korasikororũ sēni koojaijũ'u”, chiisi'kua'mu.

9 Chikuna asa sani, “Utija'okororũ chu'uni ñisijũ'u”, chiisi'kua'mu chu'u repaũ'te. Chikuna chu'ure ija'che i'kasi'kua'mu repaũ: “Jaũ. Juma; koo ãnisõjũ'u ikororũ. Ikororũ ãnisõru mu'u chu'opo pũjija'ñe sãijachu'opo pa'ija'mu

mũ'ure. Jã'ata'ni repakororũ ãni rũosirũmũ mũ'ũ cõtaro'ta'ni kajacõtaro pa'ija'mũ mũ'ure", chiisi'kũa'mũ repaũ chũ'ure.

¹⁰ Chikũna, "Jau", chini repakororũ ãsiũna koo ãnisõsi'kũa'mũ chũ'ũ. ãnisõũna chũ'ũ chũ'opo pũjija'ñe sãijachũ'opo pa'isi'kũa'mũ. Jã'ata'ni repakororũ ãni rũosirũmũ chũ'ũ cõtaro kajacõtaro'chi'a carũnisõsi'kũa'mũ.

¹¹ ãni pi'nisirũmũ jo'e chũ'o i'kache asasi'kũa'mũ chũ'ũ, ija'che chiiche'te: "Dios, 'Ija'che cho'oja'mũ', chiisi'e pãire jo'e kũakũ pa'ijũ'ũ, Repaũ, 'Si'avãjũpãi si'achejña pa'inare pãi si'ache chũ'o cutunana'me pãi chũ'unare ija'che cho'oja'mũ chũ'ũ', chiisi'ere".

11

Dios chũ'o kũajana Repaũ saocojñojana cho'ojachere kũamũ

¹ Ũcuarũmũ Dios chũ'ure vãsocho cuasa ñajaño ãsiku ija'che i'kasi'kũa'mũ chũ'ure: "Ichopi chũ'ũ vũ'ere repa ã'capũna'me repacuecho cuasa ñajaijũ'ũ mũ'ũ. Ũcuachi'a repavũ'e pa'iko'a chũ'ure ãsimajñaruã tũo uoko'are cuasa ñakũ, chũ'ure pojoũu chini repavũ'e chi'i pa'inare kuẽkue ñajũ'ũ.

² Repavũ'e ve'se cararipũta'ni cuasa ñamanejũ'ũ. Chũ'ure cuhenare jo'kasiraripũ'me jã'araripũ. Na'a pa'isirũmũ repana chũ'ure cuhena rani chũ'ũ neejoopo Jerusalén vũ'ejoopo ñañosõ repajoopo canare chẽa paajũ cuarenta y dorepapãimia cu'ache cho'ojũ pa'ijanaa'me.

3 Reparumũ chũ'u chũ'o kũajanare te'eka'chapanare saoja'mũ chũ'u, sani pãire chũ'u chũ'ore kũaju paapu chini. Kãña vãkiniokãñare ju'iju chũ'u, 'Kũajũ'u', chiisi'ere mil doscientos sesentarepaumucujña kũaju pa'ijanaa'me repaña", chiisi'kũa'mũ Repau chũ'ure.

4 Repaña Dios chũ'o kũajana Repau peore chũ'ũku ti'jñeñe nukãñã olivo sũkiñã te'eka'chapañãja'ñea'me. Ũcuachi'a uoñoã pa'isaivũã te'eka'chapasaivũã Dios ti'jñeñe pa'isaivũãja'ñea'me repaña.

5 Pãi repañare cuhenapi cu'ache cho'oũu chito repaña chũ'opoãpi toa eto repañare peore uosõjanaa'me. Pãi ũcuauana repañare cu'ache cho'oũu chiina, jã'aja'ñechi'a ũcuauũko jũ'ijanaa'me.

6 Ũcuachi'a repaña Dios chũ'o kũarũmũchi'a okopi ramanea'ku chini repañare chũ'u jo'kauato chũ'ũmasijanaa'me repaña. Ũcuachi'a chiañaãna'me chiaraã chie caũñoũato chũ'ũmasijanaa'me repaña. Ũcuachi'a repañani chejana'me cheja pa'inani si'ache cu'ache cho'ouato cho'omasijanaa'me repaña. Repa cu'ache cho'ochete repañani te'echochi'a chekũrũmũ rũarepañoã cho'ouato cho'omasijanaa'me repaña.

7 Repaña Dios chũ'o kũa pi'nisirũmũ cu'arepache cu'aku vati pa'icojepi mũni eta repañare cavaku cajejani vanisõja'mũ.

8 Vanisõũna ujavũ'ejoopo callejoovũãre ũhijanaa'me repaña'na. Aperũmũ ũcuajoopona pãi maire Paaku'te Jesucristo'te kurususẽ'verona

jē'jo vēasōsinaa'me. Jā'ajekuna pāi repajoopo canare ñajɯ i'kani, “Sodoma vɛ'ejooopo pa'isinana'me Egipto cheja pa'isina pa'icheja'che cu'ache pa'inaa'me jā'ana”, chiinaa'me.

⁹ Chuenisō choteumucujña jo'e chekumucuse joopo ũcuachejña ũhiva'nani pāi si'achejña canana'me si'avājɯpāina'me si'ache chɔ'o cutuna rani ñajanaa'me repava'nare. Repava'nani cuhejɯ repava'nare tāñeta'ni ũsejanaa'me repana.

¹⁰ Pāi cheja pa'ina repanapi Dios chɔ'ore pa'i sɯma'ñe kɯajɯna asacuhejɯ pe'rujɯ cuhejanaa'me repanare. Jā'ajekuna repana chuenisōsi'ere asani rɯa pojojɯ fiesta cho'oju pōse sāiñechi'a rupɯ ĩsijanaa'me repana.

¹¹ Jā'ata'ni choteumucujña jo'e chekumucuse joopo pa'isirumɯna chuenisōsiva'nata'ni Diopi vasɔɯna vajɯrani jo'e vɯni nukajanaa'me repana. Vajɯrani nukajɯna repanare ñasina ũcuanɯko rɯa kɯkɯsōjanaa'me.

¹² Ũcuarɯmɯ repana Dios chɔ'o kɯajava'na vajɯrani nukajɯ cɯnaumɯpi chɔ'o ɯjachɯ'opi repanare i'kache ija'che chiiche'te asajanaa'me: “Ichejana mɯijũ'ɯ”, chiiche'te. Jā'aja'ñe i'kaɯna asa repanare kuhena ñajɯ'te piko sa'navɯji cɯnaumɯna mɯnisōjanaa'me repana.

¹³ Repana mɯnisōrɯmɯ ũcuate'erɯmɯ cheja teana rɯa pi'ruja'mɯ. Pi'rukuna repajoopo pa'ivɯ'ña te'evɯ'ña ñaña tajñosōja'mɯ. Jā'aja'ñe cho'oɯna pāi siete milrepana jūnisōjanaa'me. Jā'ata'ni chekuna jū'imatejana vajuchujɯ rɯa kɯkɯsōsinapi, “Dios Cɯnaumɯ Pa'ikɯ peore

Masiu'mu", chijjanaa'me.

¹⁴ Jã'aja'ñe ka'chañoã cu'ache
ti'jñecuhasiřumũ jo'e chekũcho, cu'ache
ti'jñejañe tĩ'api'raja'mũ.

Trompetavũ cuhacho juhisi'vũre i'kamũ

¹⁵ Ũcuarũmũ chũ'u jo'e chekũpi ángelpi
cuhacho juhikũji repaũ trompetavũ'te jukũna
chũ'o rũa ujachũ'o cũnaũmũpi ija'che i'kache'te
asasi'kua'mũ:

Maire Paakũ Dios Repaũ cheja Raosi'kũ
Cristona'me pãi cheja pa'inare
ũcuanũkore

cuhama'ñe si'arũmũ chũ'ũkũ pa'ija'mũ,
chiĩsi'kua'mũ.

¹⁶ Ũcuarũmũ aina veinticuatrorepana Diore
ti'jñeñe repaña ñu'isaivũã ñu'isinapi vũni meñe
sime ñu'ijũ Dioni pojojũ,

¹⁷ ija'che i'kasinaa'me:

Dios Chũkũna'te Paakũ, peore Masiu'mũ mũ'u.
Iřumũjẽ'e pa'ia cheja chuta'a cho'omarũmũjẽ'e
pa'ikũ'mũ mũ'u.

Mũ'ũpi pãi ũcuanũkore mũ'u peore masicheji
chũ'ũpi'ra'kũna, "Re'orepamũ", chiime
chũkũna mũ'ũre.

¹⁸ Pãi si'achejña pa'ina mũ'ũre cuhejũ pe'runa
pa'ime.

Chura mũ'u repañare sãiñe pe'rurũmũ
tĩ'acuhamũ.

Ũcuachi'a mũ'u pãi jũnisõsina repaña chuta'a
vajũrũmũ pa'ijũ cho'osi'e ro'i peore
ro'iche'te chũ'ũkũ,

mũ'ũre cho'okaijũ mũ'u chũ'o kuasinana'me
mũ'ũre cuasajũ vajũchũnare masinana'me

repau. Jã'aja'ñe cho'ocuha romio chĩipi'rasi'ko ti'jñeñe'te pa'iu cha'asi'kua'mu repau, repaoji chĩiva'uni cajaanã ãnisõkasa chini.

5 Ũcuarumu repao romio chĩiva'ure umuva'uni jñaaasi'koa'mo, repau'te cuhenare cajejani pãi ucuanukore chũ'ujava'ure. Jã'ata'ni repava'ure chĩiva'ure jñaaona Diopi tua cunaumuna Repau chũ'uku ñu'isaiivu rũicheja ti'jñeñena muasi'kua'mu.

6 Jã'a cho'oto puka'ko Dios repao'te care'vakaisichejana pãi peochejana vu'vu katisõsi'koa'mo. Vu'vu kati pa'iona Dios repao'te mil doscientos sesentarepaumucujña au kuiraku pa'isi'kua'mu.

7 Ũcuarumu cunaumu pa'ina cavasinaa'me. Angel, Miguel repau neena ángelena'me añaja'iu'ni cavasinaa'me. Añaja'iu ucuchi'a repau neena ángelena'me sãiñe ucuanukore cavasinaa'me.

8 Jã'ata'ni añaja'iu'te repau neenana'me chekunare cava cajejaicu'asi'kua'mu. Jã'arumupi vua Dios repanare Repau pa'icheja pa'iche ñsesi'kua'mu.

9 Jã'ajekuna Dios repau'te añaja'iu'te cu'a chũ'umasi aire ángeles repau neenana'me cunaumu pa'iche'te ñseku eto chejana raosi'kua'mu. Repau añaja'iu ka'chamajña mamí ve'em, "Vati aina'me Satanás". Repau vati ai mamarumupi vua pãi si'achejña pa'inare re'oja'chere ñseku cacu'ora chini joreku pa'iku'mu. Jã'aja'ñe cho'okujekuna vati ai repau neena ángelena'me cunaumu eto chejana

raocojñosi'kua'mu.

10 Ûcuarumu chu'o i'kache cunaumupi
ujachu'o ija'che i'kache'te asasi'kua'mu chu'u:

Vati ai, Diore cuasanani re'oja'chere ãseku
cacu'ora chini

umucusena'me ñami Dioni ke'reku Repau'te
cuasanani cu'ache i'kakü pa'imü.

Repau'te cuasanare jä'aja'ñe i'kakü'te Dios che-
jana eto raosi'kua'mu.

Jä'aja'ñe cho'osi'ku Dios Repau neenare Repau
pa'ichejana saja'mu, ai sani paarü chini.

Ûcuachi'a Repau peore masiche cho'o ñoku'mu
Repau.

Ûcuachi'a päi ñucanuko Repau chü'ũñe cho'oju
pa'ijanaa'me.

11 Chekuna Diore cuasana, “Ovejachijia'ia Je-
sucristo mai cu'ache cho'oche'te jüni
ro'ikaisi'kua'mu.

Ûcuachi'a Dios chu'o ñcuarepaa'me”, chiiju
cuasanajeju vati ai chü'ũñe cho'oma'me
repana.

Ûcuachi'a Diore cuasanajejuna, “Päi maire
vanisõjanaa'me”, chini masinata'ni

jü'iñejẽ'e vajuchuma'ñe Repau'te cuasache
ũhasõma'ñe ñcua cuasaju pa'inaa'me.

12 Jä'ajekuna musanukona cunaumu pa'ina
ñcuanuko pojoju pa'ijũ'u.

Jä'ata'ni musanukonare cheja pa'inana'me mar
chiara pa'inare rua cu'ache ti'jñeja'mu.

Vati ai repau cho'oche ai ñsejarumupi
tĩ'api'rakuna masiku musanukonani
cu'ache cho'ora chini rua pe'rukü
cajesi'kua'mu,

chiiche'te asasi'kua'mu chu'u.

¹³ Ūcuarumu añaja'iu chejana repau eto raocojñosirumu ch'iiva'ure jñaasi'koni romioni cu'ache cho'ora chini ku'esi'kua'mu.

¹⁴ Jā'ata'ni repao romio tao kue'chaka rua űjakare te'eka'chapaka ĩsicojñosi'koa'mo, pāi peochejana Dios repao'te care'vakaisichejana cāva ku'io sani pao chini. ĩsiuna koo cāva ku'io sani tī'a pa'iona choteũsurumu jo'e chekuũsurumu joopo āu kuiraku repao'te añaja'iu cu'ache cho'oche űsekaisi'kua'mu Dios.

¹⁵ Ūcuarumu añaja'iu repau chu'opoji chichajaja'che oko etosi'kua'mu repaoni rño véasōra chini.

¹⁶ Jā'ata'ni cheja repaoni cho'okaiu pāi chu'opo cha'acheja'che rūhicoje vata añaja'iu raosi'e oko sa'nayuna cuaosōsi'kua'mu.

¹⁷⁻¹⁸ Chejapi jā'aja'ñe cho'ouna añaja'iu na'a rua pe'rukū repao'te romio'te jo'ka chekūnani repao mamachiire Dios chũ'ũñe cho'ojū Jesús pa'iche űcuarepa kũachũ'o űhamanesinani űcuanukore cavara chini sanisōsi'kua'mu.

13

Cu'arepache cu'ana te'eka'chapana cho'osi'ere kumatū

¹ Ūcuarumu chu'u mar chiara rūtūva'te nukasi'kua'mu. Nukaku cu'arepache cu'aku'te sījo sieterepasījo paakūji e'chosē'ña dierepasē'ña paakūni mar chiaraji etauna ñasi'kua'mu chu'u. Repasē'ña pa'iche tuhivūã tuhikūji repau sījore mami tochasi'e, Diore cu'ache i'kache'te paasi'kua'mu repau.

2 Repau cu'aku chu'u ñasi'ku tochachaija'iuji cū'a mie cū'aja'ñe paakuji repau chu'opo león chai chu'opoja'che paasi'kua'mu. Jā'aja'iuñi añaja'iu repau cho'omasiche'te jo'kaku repau chũ'uku ñu'isaivu'te jo'kasi'kua'mu repau'te, ũcuasaivu'te ñu'iu päire chũ'uku paau chini.

3 Repau cu'arepache cu'aku sijo te'esijopu asimaka jünisōmaka pa'isijopuja'che paasi'kua'mu. Jā'aja'ñe ũjamakapi ja'jusi'ere ña rua cuasaju pāi si'achejña pa'ina ũcuanuko pojojū jovosinaa'me repau'te.

4 Añaja'iu'te cu'arepache cu'aku'te pāi chũ'uñe jo'kasi'kujekuna ro're puu pojosinaa'me repana. Repau'te cu'arepache cu'aku'te ũcuachi'a pojojū, "Iku cho'ocheja'che cho'omasina peome. ũcuachi'a ikure cavajū cajejaimasina peome", chiisinaa'me repana.

5 Reparumu cu'arepache cu'aku Diopi ũsemauna repau meñe rua re'oja'che i'kachena'me Dios asacuheche i'kache jo'kacojñosi'kua'mu. ũcuachi'a cuarenta y dorepapāimia cu'ache cho'omasiche jo'kacojñosi'kua'mu repau.

6 ũcuarumu Dioni cu'ache i'kaku Repau asacuheche'te i'kaku cunaumu pa'ivu'ere Repau vu'ere cu'ache i'kaku Repau neenare cunaumu pa'inare ũcuachi'a cu'ache i'kasi'kua'mu repau.

7 ũcuachi'a Diopi Repau neenani ũsemauna cavaku cajejaisi'kua'mu repau. ũcuachi'a Repauji ũsemauna si'avājupāina'me si'ache chu'o cutunana'me si'achejña pa'inare chũ'uñe jo'kacojñosi'kua'mu repau.

8 Pāi ũcuanuko cu'ache cho'osi'ere jūni ro'ikasa chini chuenisōsi'kū Jesucristo Ovejachīija'ia utija'ophurona repaṇa mami tochacojñomanesina ũcuanuko cheja si'acheja pa'ina pāi pojojū ro're ñu'ijū pojosinaa'me repaṇ'te cu'arepache cu'aku'te. Aperumū cheja chuta'a cho'omarumū Dios Repaṇa'me pa'ijana mami ũcuaphurona tocha jo'kaasomū.

9 Pāi ie chu'o asa chēaṇana ũcuanuko asa chēajū'ū:

10 Mūsanukonare Jesucristo'te cuasanare pāi chēavū'ena chēa cuaosina na'a pa'isirumū ũcuaja'che chēa cuaocojñojanaa'me.

Ūcuachi'a pāi mūsanukonare Jesucristo'te cuasanare pāi vaiva'tipi vanisōsina na'a pa'isirumū ũcuaja'che pāi vaiva'tipi chuenisōjanaa'me.

Dioni cuasajū mai jā'aja'ñe cu'ache cho'ocojñojañe masinata'ni koka paajū Repaṇ'te cuasache ũhasōma'ñe, “Dios maire rūa re'oja'che cho'okaikū'mū”, chiijū cuasajū pañu.

11 Jā'a ñacuhisirumū chekure cu'arepache cu'aku'te cheja sa'navūji etaṇa ñasi'kua'mū chu'ū. E'chosē'ña ovejachīi e'chosē'ñaja'ñe te'eka'chapasē'ña paakuta'ni añaja'ia i'kacheja'che i'kasi'kua'mū repaṇ.

12 Ūcuachi'a charo raisi'kū cu'arepache cu'aku pāi chū'ūñeja'ñe pāi si'acheja pa'inare chū'usi'kua'mū repaṇ cho'je raisi'kū cu'aku. Reparumū pāipi repaṇni charo raisi'kūni cu'akūni asimaka vasocojñosi'kūni pojoajū chini chū'usi'kua'mū repaṇ, cho'je raisi'kū.

13 Ūcuachi'a Diopi ũsemauna Repauchi'a cho'omasicheja'che si'ache cho'oku pāi ñajũ'te cunaumupi chejana toa tuã'iñe cho'osi'kua'mu repau.

14 Repaum Diopi Repauchi'a cho'omasiche'te cho'o ũsemauna cho'je raisi'ku cu'aku, charo raisi'ku ñaku'te Diochi'a cho'omasicheja'chere cho'ouna ña cheja pa'ina ũcuanuko repau joreku cho'oku i'kache asa jachama'ñe cuasasi-naa'me. Ūcuachi'a repau repanare, asimaka jūnisōmaka pāi vaiva'ti tēosimaka sījopu'te su'iu vasocojñosi'kujava'ure tũo nuko pojoa'ju chini chũ'usi'kua'mu repau.

15 Jã'aja'ñe chũ'uuna asa charo raisi'ku cu'akujai'u'te tũo pi'nirena repauni Diopi ũsemauna repau chũ'opoqueepi tutu juju repana tũosiva'ure vajuche cho'osi'kua'mu repau, ũcuava'upi chũ'o i'kaku repau'te pojomanani vanisōñe'te chũ'ua'ku chini.

16 Ūcuachi'a pāi ũcuanukore pāi chũ'unana'me chũ'umanare, kurinana'me chũ'ova'na pa'inare, chẽa paacojñonana'me chẽacojñomanare, repana ujjajñana jã'apãani repana chiarũana repau mamire tochacojñoa'ju chini chũ'usi'kua'mu repau.

17 Jã'ajekuna pāi repau mamijẽ'e repau númerojẽ'e tochacojñomanesinare pōse koochena'me pōse ñiche ũsesi'kua'mu repau.

18 Repau cu'aku número pa'iche masiñu chinare rua kuẽkueche chiimũ. Repa número pa'iche'te cuasa kuẽkue ñato pāiu mamire kuamũ. Repa número iea'me: seiscientos sesenta y seis.

14

Pāi ciento cuarenta y cuatro milrepana ujasí'ere khamu

¹ Ũcuarumu chu'u Ovejachĩija'ia'te Jesucristo'te Sión aikūti nukakuni ñasi'kua'mu. Ũcuana'me pāi ciento cuarenta y cuatro milrepana repaña chiapũãre Repau mamina'me Puka'ku mami tochacoñnosina nukasinaa'me.

² Jã'a ñacuhásirumu cunaumupi ija'che i'kachu'o asasi'kua'mu chu'u: Oko chã'ia asocheja'che asosi'kua'mu repachu'o. Ũcuachi'a okopi ruarepa curuku asocheja'chena'me pãipi jairepanuko arpavũãre cho'ojuna asocheja'che asosi'kua'mu chu'ure repachu'o.

³ Ũcuachi'a repaña pāi Dios chũ'uku ñu'isaiũana'me Repau ti'jñeñe pa'ina vajupāi ũcuaka'chapana pa'ichejana'me aina pa'icheja ti'jñeñe'te pa'ijũ uja mamare ujajũ pa'isinaa'me. Repaña ujache uja te'eũ'terejẽ'e asa chẽa ujacu'ache pa'isi'kua'mu. Jesucristo vati toare saimanea'jũ chini chẽa paacojñona ciento cuarenta y cuatro milrepanachi'a ujamasinaa'me repa.

⁴ Cheja repaña pa'irumu romi ũcuanaanare ja'me kãima'ñe re'oja'chechi'a pa'isinajẽjũ chura Ovejachĩija'ia Jesucristona'me pa'ijũ Ũcuau chũ'ũñe'te si'arumu cho'ojũ pa'ime repaña. Aparamu Diore cuasamanare ja'me pa'isinaa'me repaña. Jã'ata'ni Dios repañare paara chini Repau Mamakuna'me charo chẽaasomũ.

5 Ûcuachi'a jmamakarujê'e joremaneasome. Ûcuachi'a repaña rekoñoã Diopi ñato cu'achejê'e peoasome repaña.

Angeles chotena rani kxasi'ere i'kamx

6-7 Jã'aja'ñe cho'ocuhasiřmũ ángel'te cunaũmũ chenevũji cãva ku'iu cheja pa'inani pãi Ûcuanũkore si'avãjũpãina'me si'ache chũ'o cutunana'me si'achejña pa'inare, Jesucristo'te cuasache chũ'vachũ'ore kũakũ ujachũ'opi pãire ija'che i'kakũni ñasi'kũa'mũ chũ'ũ:

—Diore vajũchũjũ re'oja'chere Repaũ'te i'kajũ pa'ijũ'ũ mũsanũkona, pãi Ûcuanũko cho'osi'e Repaũ ñarũmũ tĩ'api'rakũna. Ûcuauji cunaũmũna'me chejana'me mar chiarana'me oko puni si'achejña pa'inare cho'osi'kũa'mũ. Jã'ajekũna Repaũni cuasajũ, “Peore Masiũ'mũ mũ'ũ”, chiijũ pojojũ'ũ —chiisi'kũa'mũ repaũ ángel.

8 Jã'aja'ñe i'kacuhaũna chekũ ángel rani ija'che i'kasi'kũa'mũ:

—Babilonia ujavũ'ejoopo ñañasõcuhasi'kũa'mũ, repaña cu'ache cho'osi'e ro'i. Repajoopo pa'isina cu'ache cho'ojũ pa'iche'te chekũchejña cana Ûcuanũko ña chẽa repaña cho'ocheja'che cu'ache cho'ojũ pa'isina'me —chiisi'kũa'mũ.

9-10 Jã'aja'ñe i'kacuhaũna jo'e chekũ ángel rani ujachũ'opi ija'che i'kasi'kũa'mũ:

—Cheja sa'navũ etasi'kũre cu'arepache cu'aku'te repaũjava'ũre tũosi'kũna'me pojojũ repaña chiarũãna jã'apãani repaña jũjña repaũ cu'aku mami tochacojñosinare Ûcuanũkore rũa pe'rukũ cu'ache chũ'ũja'mũ Dios. Repaũji

chũ'uuna vati toa azufre vnocheja'che cu'asuche uutoana sani Dios neena ángelena'me Repau Mamaku Ovejachĩija'ia ñaju'te rua chũova'na ai uuju pa'ijanaa'me repana.

11 Repa toapi chachama'ñe ai uuku pa'iana piko si'arumu mũiu pa'ija'mu. Ũcuachi'a cu'arepache cu'akuna'me ũcuauja'ia tũosiva'ure pojoju repau mami tochacojñosinare repa toare si'arumu uujuna asiche cuhama'ñepi pa'ija'mu —chiisi'kua'mu.

12 Dios neenata'ni Repauni cuasajuna repanare cu'ache ti'jñejañe masinata'ni Dios chũ'usi'ere cho'ojũ re'oja'che pa'iju Jesucristo'te cuasache ũhasõma'ñe koka paaju ũcua cuasaju pa'ijanaa'me.

13 Ũcuarumu cunaumupi chũ'o ija'che i'kache'te asasi'kua'mu chũ'u:

—Iere tochajũ'u mũ'u: “Dios neena Repau'te cuasache ũhamana irumupi vna jũnisõna rua pojoju pa'ijanaa'me” —chiiche'te. Chikuna Dios Rekocho ija'che i'kasi'kua'mu:

—Ũcuarepaa'me jã'a. Repana jũnisõsirumu repanare cu'ache ti'jñesi'e jo'e ti'jñemanaja'mu. Repau pa'ichejana satena repa re'oja'che cho'ojũ pa'isi'ere cuasa ro'ija'mu Dios repanare —chiisi'kua'mu.

Trigona'me uchecha'charũã tua chi'icheja'che Dios Repau'te cuasamanare chi'i cu'ache chũ'ujañere kumatũ

14 Jã'aja'ñe cho'ocuhasirumu jo'e ñaku poja'chere piko ñasi'kua'mu chũ'u. Piko sē'sevũ'te pãire ja'me paaũ chini Dios Raosi'ku

ñu'isi'kua'mu. Repau sĭjopu pachokurivu'te tuhivu tuhiva va'ti jũjusuche cu'tosiva'tire cãjiku ñu'isi'kua'mu repau.

15 Ūcuarumu ángel cheku Dios vu'epi eta piko sē'sevu ñu'iku'te ujachu'opi ija'che i'kasi'kua'mu: “Trigo tuarumu pa'icheja'che pa'irumu tĩ'acuhumu. Mu'u va'ti mini trigo tua chi'icheja'che cho'ojũ'u”, chiisi'kua'mu.

16 Jã'aja'ñe i'kauna asa piko sē'sevu ñu'iku repau va'ti mini trigo tua chi'icheja'che cheja pa'inare cho'osi'kua'mu.

17 Ūcuarumu ángel cheku jo'e Dios vu'epi cunaumu pa'ivu'epi va'ti ũcuaja'che jũjusuche cu'tosiva'tire cãjiku etasi'kua'mu.

18 Reparumu ángel cheku Diore ĩsimajñaruã uotoa kuirache chũ'uku tuo uoko'a rũichejapi eta va'ti jũjusuva'ti cãjiku'te ujachu'opi ija'che i'kasi'kua'mu:

—Ūche cha'jisõcuhasi'kua'mu. Chejana caje mu'u va'ti jũjusuva'tipi uchecha'charuã chuto tutemejũ'u —chiisi'kua'mu repau.

19 Chikuna caje uchecha'charuã cheja pa'iche repau va'tipi chuto tute pi'ni chi'i uche cha'ca chachovuna mañasi'kua'mu repau. Dios Repau'te cuasamanesinare ũcuaja'che uchecha'charuã tua chi'isi'ejache chi'i rua cu'ache cho'oja'mu.

20 Reparumu uche cha'cavuji vu'ejoopo jã'acho'jere pa'iuana uchecha'charuã etua ũcuavuna maña cha'ca chachojuna uche okora'ka repavu vu'evu cacojepi eta chiacha meañeja'ñe chie so'ona measi'kua'mu,

trescientos kilómetros repa so'o. Repa chiera'ka
 rua ruisi'kua'mu.

15

*Pāi cu'ache cho'osi'ere ro'iajũ chini Dios
 chũ'usi'e cu'ache sieterepamajña cho'okaina
 ángeles cuhacho cho'osi'ere kũamũ*

¹ Ūcuarũmu cunaũmu Diopi jo'e chekere
 ñavajũchũache'te ñokũna ñakũ ángeles si-
 eterepanare pãipi repa cu'ache cho'osi'e
 ro'ire ro'ia'jũ chini Dios pe'rukũ chũ'usi'e
 cu'ache sieterepamajña cuhacho cho'ojamajña
 cho'okaijanare ñasi'kua'mu chu'ũ.

² Ūcuarũmu chiara joicunaja'ñe etajaiche
 ñora'te ñasi'kua'mu chu'ũ. Repara sa'navũ
 toa pa'isi'kua'mu. Ūcuachi'a repa ru'tava'te
 cu'arepache cu'aku'te cuhejũ ũcuauja'ia'te
 tũosiva'urejẽ'e pojocuhejũ repaũ mamina'me
 repaũ númerojẽ'e tochacojñomanesina Dios
 ñisivũãre arpaũã cãjijũ nukasinaa'me.

³ Reparũmu repa Dioni pojojũ uja'jũ
 aperũmu Dios chũ'ũñe cho'okaisi'kũ Moisés
 ujasí'ere uja uja'jũ Jesucristo Ovejachĩija'ia'
 ujasí'e ũcuachi'a ujasinaa'me, ija'chere:
 Dios, Chũkũna'te Paakũ peore cho'omasikũ'mu
 mu'ũ.

Mu'ũ masikũ cho'оче ña jñanosõme chũkũna.
 Rua re'oja'che cho'okũjekũ peore ũcuarepa
 cho'okũ pãi si'achejña pa'inare
 chũ'ũku'mu mu'ũ.

⁴ Mu'ũchi'aa'mu re'okũ.

Jã'ajekũna mu'ũre vajũchũnaa'me chũkũna.

“Peore masikũ'mũ”, chiinaa'me chũkũna
mũ'ũre.
Mũ'ũ re'oja'che cho'okũ pa'iche'te ña pãi,
si'achejña pa'ina mũ'ũ ti'jñeñena rani
ro're pũũ ñu'ijũ pojojanaa'me mũ'ũre,
chiiũ ujasinaa'me repaña.

⁵ Repaña ujacuhasirũmũ cũnaũmũ pa'ivũ'e
Dios vũ'e jatisa'arõji vataũna repavũ'e caruũpũ
Dios chũ'ũsi'e tochasiko'ña catako'ña pa'iruũpũ
ñasi'kũa'mũ chũ'ũ.

⁶ Ũcuarũmũ repaña ángeles sieterepaña
ũcuavũ'e sa'navũji etasinaa'me Dios chũ'ũsi'e
cu'ache sieterepañamajñarũã cho'okaijana. Lino
kãña meno peokãñapi ko'sijakãñare ju'ijũ
ã'carũãre pachokurimeã tũisinaa'me repaña.

⁷ Ũcuarũmũ vajũpãi ũcuaka'chapana
te'eu repañare ángeles sieterepañare te'eu'te
te'ero'rochi'a coparo'ro pachokuriro'rore Dios
Si'arũmũ Pa'ikũ pãire cu'ache cho'ora chini
chũ'ũsi'e timuñe mañasiro'rore ñisi'si'kũa'mũ.

⁸ Reparo'ro ñisicuhasiirũmũ Dios vũ'e sa'navũ
peore piko rũa pa'isi'kũa'mũ, Repañji miañeja'ñe
Ko'sija'ũji peore Masikũji pa'ũana. Repañ
chũ'ũsi'e cu'ache sieterepañamajña ángeles
cho'o pi'nikaichetũ'ka pãi te'eu'terejẽ'e
kakacu'asi'kũa'mũ repavũ'e.

16

*Coparo'ro pãire cu'ache cho'ora chini Dios
chũ'ũsi'e mañasiro'roquee ña'ñesi'ere kũamũ*

¹ Ũcuarũmũ Dios vũ'e sa'navũji chũ'o
ũjachũ'opi ángeles sieterepañani ija'che
i'kache'te asasi'kũa'mũ chũ'ũ: “Mũsanũkõna

cājiro'ro pāire cu'ache cho'ora chini Dios pe'rukū
chũ'usi'e mañasiro'ro chejana ña'ñejaijũ'ũ",
chiiche'te.

² Jā'aja'ñe i'kauna ángel te'eũ repaũ
cājiro'rova pa'imajñaruã chejana peore
ñatojaisi'kua'mũ. Repaũ ñatojaisirũmũ
pāi cu'arepache cu'akũ mami tochacojño
ũcuauja'iu'te tũosijava'ũre pojonare ũcuaukore
cu'aasi ruã asicheji etauna ruã chuova'na
pa'isinaa'me.

³ Jā'aja'ñe cho'ocuhauna ángel chekũ repaũ
cājiro'rova pa'imajñaruã peore mar chiarana
ñatosi'kua'mũ. Ñatouna mar chiaraquee oko
jũnisõsi'kũ chieja'che carũhisi'kua'mũ. Jā'aja'ñe
cho'oũna va'iva'na repara pa'iva'na peore
jũnisõsinaa'me.

⁴ Jā'aja'ñe cho'ocuhauna jo'e chekũ
ángel repaũ cājiro'rova pa'imajñaruã
peore chiañaãna'me oko punire
ñatouna repachejñaquee oko peore chie
carũnisõsi'kua'mũ.

⁵ Jā'a cho'osi'ere ñacuha ángel chiañaã
kuirakũ Diore ija'che i'kache'te asasi'kua'mũ
chu'ũ:

Dios, ruã re'okũ'mũ mũ'ũ.

Irumũjẽ'e pa'iu chuta'a cheja cho'omarũmũjẽ'e
pa'ikũ'mũ mũ'ũ.

Pāire cu'ache cho'okũ iñaã chiañaã pa'iche
oko chie carũnisõñe chũ'ũkũ ũcuarepa
cho'omũ mũ'ũ.

⁶ Ũcuapani mũ'ũ chu'o kuava'nare vanisõasome
mũ'ũ neenare chekũnare ũcuachi'a.

Chura repaña chuenisōsiva'na raosi'ere chiere ña pe'rukũ ũcuava'na chiere ũkuamũ mũ'ũ repañare vanisōsinare.

Repaña ro'ia'me jā'a,
chiiche'te.

⁷ Ũcuarũmũ Diore ĩsimajñaruã tuo uoko'a sa'navũji chũ'o ija'che chiiche'te asasi'kua'mũ chũ'ũ: “Pãĩ Ũcuauũkore Paaku, peore masakũ'mũ mũ'ũ. Pãĩ ũcuauũko cho'oju pa'isi'ere ña cuasaku cu'ache chũ'ũku rũhiñe cho'omũ mũ'ũ repañare”, chiiche'te.

⁸ Ũcuarũmũ ángel jo'e cheku repañ cãjiro'rova pa'imajñaruã peore ũsuũni ñatosi'kua'mũ. Ñatouña Dios ũsuũ'te na'a rũa asua'ku chini chũ'ũsi'kua'mũ, pãipi uua'ju chini.

⁹ Ũsuũji jā'aja'ñe cho'ouña pãĩ ũcuauũko repaña ca'nivũã rũa uusinaa'me. Rũa cu'ache cho'ocojñonata'ni repaña cu'ache cho'oche ũcua ũhasōma'ñe pa'ijũ repañare cu'ache ti'jñeñe chũ'ũku'te Diore, “Peore masakũ'mũ mũ'ũ”, chiima'ñe Repañ'te rũa cu'ache i'kasinaa'me repaña.

¹⁰ Ũcuarũmũ ángel jo'e chekupi cu'arepache cu'aku chũ'ũku ñu'isaivũna repañ cãjiro'rova pa'imajñaruãre ñatouña repañ chũ'ũcojñona pa'ichejña peore chijachejñachi'a carũnisōũna repachejña pa'ina asire eto asikũna repaña chemeñoãna meñe kũkujũ oisinaa'me.

¹¹ Jã'aja'ñe rũa cu'ache cho'ocojñonata'ni repaña cu'ache cho'oche ũcua ũhasōma'ñe pa'ijũ repañani asipi ruarepajeku ca'nivũãpi asikũna Diore Cũnaũmũ Pa'ĩku'te rũa cu'ache i'kasinaa'me repaña.

12 Ûcuarumũ ángel jo'e chekupi repau cãjiro'rova pa'imajñaruã Eufrates ujachiahana ñatoũna peore repacha veasõsi'kua'mũ. Jã'aja'ñe cho'osi'kua'mũ ángel, repacha chekukã'ko pa'inare chũ'unapi pãi vaiche cho'oto, jẽ'eñeji vesama'ñe paaũ chini.

13 Ûcuarumũ añaja'iu chũ'opona'me cu'arepache cu'aku chũ'opona'me, “Dios chũ'o kuaku'mũ chũ'u”, chiũ joreu chũ'opoji jojojanapi vati chotena etajuna ñasi'kua'mũ chũ'u.

14 Repana vati Diopi ñsemaũna Repauchi'a cho'omasicheja'che cho'osinaa'me. Ûcuachi'a pãi chũ'unani ùcuanukore soni rao chi'ĩnu chini cheja si'achejña ku'isinaa'me repana, chi'irena repanapi sãĩnechi'a cavaju pãi vaiche'te cho'oa'ju chini. Repana sãĩnechi'a vaiumucusena, Dios Peore Masiu cu'arepache cu'aku'te cavaku cajejaija'mũ.

15-16 Ûcuarumũ repana vati chotenapi pãi chũ'unare soni chi'isinaa'me. Repana chi'isicheja mami “Armagedón” ve'emũ hebreo chũ'o. Aperumũ Jesucristo ija'che i'kasi'kua'mũ: “Asarepajũ'u. Ñaaũ cuasomarumũna raicheja'che raija'mũ chũ'u, pãi chũ'u raijache cuasamarumũna. Kãa peonaja'ñe pa'ijũ vajuchũmaneñu chini chũ'uni cha'aju kãña care'vacheja'che repana rekoñoãre care'vajũ re'oja'che pa'ina chũ'ure ña vajuchũma'ñe tijña pojojanaa'me”, chiisi'kua'mũ.

17 Ûcuarumũ ángel jo'e chekupi repau cãjiro'rova pa'imajñaruãre tutuna ñatoũna

Dios vü'e cunaumu pa'ivü'e sa'navüji Repau chü'ukü ñu'isaivü rüichejapi chü'o vjachu'opi ija'che i'kache'te asasi'kua'mü chü'u, "Cho'o pi'nicuhasi'ea'me", chiiche'te.

18 Ūcuarumu cheja fe'neku rüa asoche curuku rüa pi'rusi'kua'mü. Aperumu rüa pi'rusi'e na'a jä'acho'je rüa ñu'kuecheji pi'rusi'kua'mü cheja reparumu.

19 Chejapi rüarepa pi'rukuna Babilonia vjavü'ejoopo joni chotejoopoã vatasi'kua'mü. Chekujooopoã si'achejña pa'ijooopoã ücuachi'a peore ñañasõsi'kua'mü. Reparumu Dios vjavü'ejoopo pa'ina cu'ache cho'osi'ere cuasa pe'rukü repanare cu'ache cho'osi'kua'mü, repana cu'ache cho'osi'e ro'i.

20 Jä'aja'ñe cho'oña juupoãna'me aiküjña peocheja si'asõsi'kua'mü.

21 Reparumu cunamüpi oko rüa vjapuãpi päi tuã'tua vëasõsi'kua'mü. Repa okopüã te'erü cuarenta kilos na'a rüa rukupüã paniasomü. Jä'aja'ñe repanani rüarepa cu'arepacheji ti'jñekuna ña päi, "Dios cho'oche'me ie", chini na'a rüa cu'ache i'kasinaa'me Repau'te.

17

Sĩ'uromio'te si'ache cu'ache cho'oko'te Dios cu'ache chü'vjañere kumü

1 Ūcuarumu repana ángeles coparo'rovaã cãjisina te'eü rani i'kasi'kua'mü chü'ure. "Raijü'u. Mü'uni chiañaã sē'sevüã ñu'iko'te sĩ'uromio'te si'ache cu'ache cho'oko'te Dios cu'ache cho'ojachere ñora.

2 Pāi chũ'una cheja pa'ina repao cu'ache cho'oko pa'iche'te ña chēa repao cho'ocheja'che cu'ache cho'ojũ pa'ime. Pāi chekũchejña cana ũcuachi'a Repao cu'ache cho'oko pa'iche'te ña chēa repao cho'ocheja'che cu'ache cho'ojũ pa'inaa'me", chiisi'kua'mũ repaũ chũ'ure.

3 Jã'aja'ñe i'kacuha Dios Rekochoji chũ'una repaũ ángel chũ'ure pāi peochejana sasōsi'kua'mũ. Sauna repao'te cu'arepache cu'akũ'te maaja'iu'te tuhikoni ñasi'kua'mũ chũ'ũ. Repaũ ca'nivũ Diore cu'ache i'kachũ'ore si'acaca'nivũ tochasi'e paakũji repaũ sũjo sieterepasĩjore e'chosē'ña dierepasē'ña paasi'kua'mũ repaũ.

4 Repaũ'te tuhiko romio kãa re'ojakãare ju'isi'koa'mo, ra'soja'chena'me maaja'ñe pa'ikãare. Ũcuakãare pachokuri catara'karuã ko'sijara'karuã ruã ro'ira'karuãna'me cheke perlara'karuã su'isi'kua'mũ. Ũcuachi'a coparo'rova pachokuriro'rova'te cãjisi'koa'mo repao. Reparo'rova sa'navũ'te repao cu'ache cho'oko pa'isi'e Dios ñacuhecheji pa'isi'kua'mũ.

5 Ũcuachi'a repao chiapũ'te mami tochasi'e pãijē'e vesũche ija'che i'kacheji su'isi'kua'mũ: "Pāi chũ'ure i'kani Babilonia ujavũ'ejoopo'te ve'onaa'me. Cu'ache cho'oche aijekona chekũna chũ'ũ cu'ache cho'oko pa'iche'te ña chēa ũcuaja'che cho'ojũ pa'inaa'me", chiiche.

6 Jã'aja'ñe repaoni masirepa ñato ruã po-joko pa'isi'koa'mo, Dios neena Jesuni cuasajũ Repaũ pa'iche kuanare vanisõñe chũ'usi'kojeko. Jã'aja'ñe pa'ikoni ña jñanosi'kua'mũ chũ'ũ.

7 Ûcuarumũ ángel chũ'ure i'kasi'kua'mũ. “¿Je'se pa'iana mũ'u jñanou? Repao pa'ichena'me repao tuhiku sijo sieterepasijore e'chosẽ'ña dierepasẽ'ña paaku pa'iche chekunajẽ'e vesuche'te mũ'uni kuara.

8 Repau mũ'u ñasi'ku cu'aku aperumũ pa'isi'kua'mũ. Chura peomũ repau. Jã'ata'ni vati pa'icojepi mũija'mũ repau. Mũni cu'ache cho'osinare cu'ache cho'ochejana saocojñoja'mũ repau. Dios aperumũ cheja cho'omarumũna Repau neena mami utija'ophurona tochaasomũ. Jã'ajekuna pãi repaphuro mami tochacojñomanesina cu'arepache cu'akũji aperumũ pa'isi'kũpi irumũ peokũta'ni jo'e raiuna ña kukusõjanaa'me.

9 'Chũ'u i'kache asamasiñu chiinapi asamasijanaa'me ie: Repau cu'arepache cu'aku sijo sieterepasijo aikũjña sieterepakũjña romio ùcuate'erumũ ñu'ikũjñaja'ñea'me. Ûcuachi'a pãi chũ'una sieterepanaja'ñea'me repa sijo.

10 Repana pãi chũ'una cincorepana jũnisõsinaa'me. Chura cheku chũ'uku pa'imũ. Jo'e chekũta'ni chuta'a raima'mũ. Repau raisirumũ jmamakaruchi'a chũ'uku pa'ija'mũ.

11 Repau cu'arepache cu'aku aperumũ pa'isi'kũpi irumũ peokũji pãi chũ'unare sieterepanare ja'me pa'iu chũ'usi'kũpi repana chũ'ucuhairumũ te'eu jo'e chũ'uja'mũ. Repau jo'e rani chũ'urumũ jũnisõ Diopi chũ'una Repau'te cuhena uutoana sani uuku pa'ija'mũ repau.

12 'Ûcuachi'a e'chosẽ'ña dierepasẽ'ña mũ'u

ñasisē'ña pāi chũ'ujana dierepana chuta'a chũ'umanaja'ñea'me. Na'a pa'isirumũ repaña pāi chũ'ũñe te'ehorachi'a jo'kacojñojanaa'me. Reparumũ cu'arepache cu'akũna'me chũ'ujanaa'me repaña.

¹³ Repaña pāi chũ'ujana dierepana ũcuate'e cuasajũ cu'arepache cu'akũji pāi ũcuanũkore te'eũ chũ'ua'ku chini jo'kajanaa'me.

¹⁴ Reparumũ repaña ũcuanũko Jesucristo'te Ovejachĩija'iañi cavajanaa'me. Jã'ata'ni Repauji pãire chẽa paakũna Repau'te cuasache ũhama'ñe pa'ijũ re'oja'che pa'inana'me cavakũ cajejaija'mũ repañare. Peore Masiũjekũ pāi chũ'ũna Aia'mũ Repau", chiisi'kua'mũ ángel chũ'ũre.

¹⁵ Ũcuarumũ repau ángel chũ'ũre jo'e i'kasi'kua'mũ. "Chiañaã sĩ'uromio si'ache cu'ache cho'oko repañaã sē'sevũãre ñu'iona mũ'ũ ñasiñaã pāi si'achejña canana'me si'avajũpãina'me si'ache chũ'o cutunaja'ñea'me.

¹⁶ Reparumũ e'chosē'ña dierepasē'ñaja'ñe pa'ina pāi chũ'ũna cu'arepache cu'akũna'me repao'te sĩ'uromio'te cuhejũ kãña peoo'te repao nee peore tuasõ repao ca'nivũquee va'i ãijũ juja uosõjanaa'me.

¹⁷ Repaña pāi chũ'ũna dierepana, Diopi repañani Repau chiiche'te cho'ouache cuasajũ cho'oa'jũ chini jo'kaũna ũcuate'e cuasajũ cu'arepache cu'akũji repaña chũ'ũñeja'ñe te'eũ pãire chũ'ua'ku chini repau'te cu'aku'te pāi chũ'ũñe jo'kajanaa'me, Dios i'kasi'e peore cho'o pi'niñejatũ'ka chũ'ũku paaũ chini.

¹⁸ Repao romio mũ'ũ ñasi'ko ujavũ'ejoopo Ba-

bilonia vɔ'ejoopoja'chea'me. Repajoopo pa'inare chũ'una chekũchejña si'achejña pa'inare pãi chũ'unare chũ'unaa'me", chiisi'kua'mu ángel chũ'ure.

18

Babilonia vɔ'ejoopo ñañasõsi'ere kua'mu

¹ Jã'a cho'ocuharumu chekure ángel'te rua masiũji cunaumupi cajekuna ñasi'kua'mu chũ'u. Repau ko'sija'icheji cheja rua miasikua'mu.

² Cajе ujachu'opi ija'che i'kasi'kua'mu repau:
 ¡Babilonia ujavu'ejoopo ñañasõcuhasi'kua'mu!
 ¡Ñañasõcuhasi'kua'mu!
 Repajoopo pa'isicheja vatichi'a rua jainuko pa'ime.

Pĩ'a pãi ãicojñomanana'me chekuna cu'ana pe-ore si'ache pa'ime repacheja.

³ Repajoopo cana cho'osi'ere ña chẽa pãi si'achejña pa'ina ũcuauko repaña cho'osi'ejache rua cu'ache cho'ojũ pa'ime.

Ūcuachi'a repajoopo canare chũ'usina si'ache cu'ache cho'osi'ere ña chẽa chekũchejña canare chũ'una ũcuaja'che si'ache cu'ache cho'ojũ pa'ime.

Ūcuachi'a repajoopo canapi põsere si'ache koojuna chekũchejña cana repanare põse ïsisina rua kurinaa'me, chiisi'kua'mu.

⁴ Ūcuarumu jo'e cheke chũ'o cunaumupi ija'che i'kache'te asasi'kua'mu chũ'u, repajoopo chuta'a ñañamarumu Dios i'kasi'e:

Repajoopo Babilonia vɔ'ejoopo pa'ina chɔ'u
neena ũcuanɔko etajũ'u, repajoopo cana
cho'ocheja'che cu'ache cho'omanenũ chini,
ũcuachi'a repanare cu'ache cho'ocheja'che
cu'ache cho'ocojñomanenũ chini.

⁵ Ũcuajoopo canapi rɔarepa cu'ache cho'ojɔna
ñakɔ
repana cu'ache cho'oche cavesɔma'ñe cuasakɔ
pa'imɔ chɔ'u.

⁶ Repajoopo cana chekɔnare cho'ocheja'che
cu'ache cho'ojũ'u repanare.

Repana cu'ache cho'osi'e ro'i ro'ia'jɔ chini na'a
rɔa cu'ache cho'ojũ'u repanare.

Ũcuachi'a repana chekɔnani cacɔ'oñu chini
cono rɔa vɛañe'te ũkuajɔ na'a rɔa vɛañe
ja'me ũkuacheja'che na'a rɔa cu'ache
cho'ojũ'u repanare.

⁷ Ũcuachi'a, "Peore masinaa'me chɔkɔna",
chiijɔ tñiñe cho'ojɔ rɔa pōse paanaa'me
repana.

Jã'ajekɔna repana pōse paachejanɔko cu'ache
cho'ojũ'u repanare, chɔova'na paapɔ
chini.

Ija'che cuasanaa'me repana:

"Chɔova'na pa'imanajejɔ pãi ũcuanɔkore
chũ'unajejɔna cu'ache ti'jñemanēja'mɔ
chɔkɔna'te", chiinaa'me repana.

⁸ Jã'aja'ñe cuasajɔ pa'inajejɔna
ũcuate'eumucuse ũcuanɔkore rɔa
si'ache cu'ache ti'jñēja'mɔ repanare.

Chekɔna jñisōjanaa'me. Chekɔna repanani
cu'ache ti'jñenɔna chɔova'na pa'ijanaa'me.

Chekuna ãiñe'te peojũ ãucuhava'na
pa'ijanaa'me.

Repajoopo ũcuachi'a peore uusõja'mũ, chũ'upi
Pãĩ Ũcuaukore Paakũji peore Masiũji
chũ'ũna,
chiisi'kua'mũ Dios.

⁹ Repajoopona'me repajoopo canare uusõku
piko mũiñe'te ñani pãĩ chũ'ũna si'achejña pa'ina
repajoopo cana cho'ocheja'che cu'ache cho'oju
pa'ina suma'ñe cuasaju ota oijanaa'me.

¹⁰ Repajoopo cana cu'ache cho'ocojñoñe'te ña
kukũcajejanisõ so'opi ñaju oiju ʷjachũ'opi cuiju
ija'che i'kajanaa'me repana:
¡Rua cu'ache! ¡Rua cu'ache!
¡Babilonia ʷjavũ'ejoopo cana teana cu'ache
cho'ocojñosinaa'me!
chijjanaa'me.

¹¹ Ũcuachi'a repajoopo pa'isinare põse ĩsisina,
repajoopo pa'isinapi cu'ache cho'osi'e ro'ire
cho'osõ peojuna, ña cuasaju ota oiju ija'che
i'kajanaa'me: “¿Chura neepi mai kuhache põse
koojanaa'ñe:

¹² pachokuri, pokuri, ko'sicatarakarũãna'me
perlara'karũã rua ro'ira'karũã, rua ro'ikãña lino
kãñana'me seda kãña maajakãñana'me chimaa-
jakãña chooko'ña si'ache re'oja'che vuoko'ña,
pachocuna cho'osimajñarũãna'me cunarepa
cho'osimajñarũã, pocata cho'osimajñarũã

¹³ ma'ñara'jñana'me suiriche, cheke ma'ña
ũche mirra ma'ñana'me vi'toma'ña, ʷche cono,
u'chape'e, harina rua me'naja'ñe ãusi'ena'me
trigo, cu'ava'nare põse ve'ova'nare, ovejava'nare,
kavachova'na, carrosai kavacho jñajñusai, pãĩ

chekunare rupũ cho'оче cho'okainare? ¿Neepi koojanaa'ñe?", chini cuasajũ oijanaa'me repaña pãi.

¹⁴ Jã'aja'ñe cuasajũ repajoopo pa'isinare ija'che i'kajanaa'me repaña:

¡Chura, m̃sanũkona si'ache karama'ñe paajũ
rũa chiijũ paasi'e p̃ose jo'e paamanejañere
ai cho'osõsinaa'me m̃sanũkona!
chiijanaa'me.

¹⁵ Ũcuachi'a p̃osemajñarũã ñisina repajoopo pa'isina cu'ache cho'ocojñoñe'te ña, vajuchujũ so'opi ñajũ nukajũ ota oijanaa'me.

¹⁶ Ija'che i'kajũ oijanaa'me repaña:

¡Rũa cu'ache! ¡Rũa cu'ache!
¡Ûjavũ'ejoopo pa'isiva'na, rũa chũova'naa'me!
Lino kãña rũa ro'ikãñare maajakãñana'me
chimaajakãña pachokurina'me
ko'sicatara'karũãna'me perlara'karũã rũa
ro'ira'karũã sũ'ikãñare si'arũmũ ju'ijũ
pa'isinaa'me repaña.

¹⁷ Cu'amajñarũã repaña paasi'e teana rũa na'mi si'asõsi'kũa'mũ, chiijanaa'me repaña.

Reparũmũ ùjavũã choo chiacha ku'ivũã ku'ina, repavũã cho'оче cho'okainana'me repanare chũ'una, mar chiaraji ku'ijũ p̃ose ñisina ùcuaja'che repajoopo uukũ piko m̃uiñe so'opi nukajũ ñajanaa'me.

¹⁸ Uukũ piko m̃uiñe'te so'opi nukajũ ñajũ, “Babilonia ùjavũ'ejoopo pa'icheja'che pa'ijoopoje'e peomũ chekũjoopoã”, chiijanaa'me.

19 Chini sũma'ñe cuasajũ oijũ repaña sũjona cha'opoãpi meñe chu'chujũ ota oijũ ija'che i'kajanaa'me repaña:

¡Rũa cu'ache! ¡Rũa cu'ache!

Ëjavũ'ejoopo pa'isinare rũa cu'ache
ti'ñesi'kũa'mũ.

Pãi ãjavũã choo paana mar chiaraji ku'ijũ repa-
joopo pa'isinani põsere ïsiyũ ãcuanũko
kurina carũhisinaa'me.

Jã'ata'ni repajoopo teana uusõsi'kũa'mũ, repa-
joopo pa'isina peore.

20 Ûcuachi'a cũnaũmũ pa'ina, repajoopo
uusõsi'ere ña pojojũ'ũ.

Mũsanũkona Dios neena ãcuaja'che repajoopo
canani ña pojojũ'ũ, Repaũ chũ'ore
chũ'vaa'jũ chini saosinana'me Repaũ chũ'o
kũana.

Dios repajoopo cana repaña mũsanũkonare
cu'ache cho'osi'e ro'ire ro'ia'jũ chini
cho'omũ,

chiijanaa'me.

21 Ûcuarũmũ ángel rũa masiũji ãjacũnapũ ãu
toapũja'ipũ'te mini ija'che i'kakũ mar chiarana
su'a rũosi'kũa'mũ:

Babilonia ãjavũ'ejoopo ipũ su'a rũocojñõñeja'ñe
cu'ache cho'ocojñõmũ.

Jã'aja'ñe cho'ocojñõũna pãi repajoopo jma-
makarũjẽ'e jo'e ñamanejanaa'me.

22 Ûcuachi'a repajoopo callejoovũã cho'ojũna
asosi'e arpavũãna'me phĩ'covũãna'me
trompetavũã cho'ojũ ãjavũna asosi'e
jmamakarũjẽ'e jo'e asomaneja'mũ.

Repajoopo cho'ochē cho'ona ũcuachi'a te'eujē'e
pa'imanejanaa'me.

Ũcuachi'a cunapũāpi toajuna asosi'e
jmamakarujē'e jo'e asomaneja'mu.

23 Ũcuachi'a repajoopo uoñoã pa'isisaivũã
te'esaivujē'e jo'e miamaneja'mu.

Ũcuachi'a repajoopo pa'isina romire
vejaju pojojũ fiesta cho'ojuna asosi'e
jmamakarujē'e jo'e asomaneja'mu.

Ũcuachi'a repajoopo pa'iju pōse ĩsisina pa'ipāi
pa'isinaa'me.

Ũcuachi'a repajoopo pa'isinapi chekũchejña
canare chai cho'ojũ jorejũ cacũ'ojũ
pa'isinaa'me.

24 Ũcuachi'a repajoopo pa'isinapi Dios chũ'o
kuanana'me chekunare Repau neenare
rua jainũkore vanisōsinaa'me.

Ũcuajoopo pa'isinachi'a chekũchejña
pa'isiva'nare vanisōsinaa'me,
chiisi'kua'mu repau ángel.

19

1 Jã'aja'ñe asacuhasiřũmũ cunauũmũpi pāi
jainũko cuijũ ija'che i'kache'te asasi'kua'mu
chũ'u:

Dioni cuasaju, “Rua re'okũ'mu mũ'u. Peore
masikũ'mu”, chiijũ re'oja'chere i'kaju po-
jojũ pañu mai.

Maire re'oja'che pa'iju vati toana saimaneajũ
chini chẽa paaku'mu Repau.

Pāi ũcuanũkore repana cu'ache cho'osi'e ro'ia'ju
chini chũ'ujajũmũ Dios.

2 Ûcuarepa cho'okujekũ romio'te rũa cu'ache cho'oko pa'isi'kore pe'rukũ cu'ache cho'osi'kũa'mũ Repaũ.

Repaoji cu'ache cho'okona ña chẽa chekũchejña cana repao cho'ocheja'che rũa cu'ache cho'oju pa'ime.

Ûcuachi'a Repaũ chũ'ũñe cho'okainare vanisõñe chũ'ũsi'kojekona pe'rukũ cu'ache cho'osi'kũa'mũ Dios repao'te, chiisinaa'me.

3 Jã'aja'ñe i'kacuha jo'e ija'che i'kasinaa'me repana:

Dioni pojojũ re'oja'chere i'kajũ pañu mai.

Babilonia ʋjavũ'ejoopo uukũ piko mũñe jma-makarujẽ'e cuhama'ñe si'arũmũ mũũ pa'ija'mũ,

chiisinaa'me.

4 Ûcuarũmũ aina veinticuatrorepana vajũpãi ùcuaka'chapanana'me sani ro're pũ sime ñu'ijũ Dioni Repaũ chũ'ũkũ ñu'isaivũ ñu'ikũni pojojũ ija'che i'kasinaa'me: “Jã'aja'ñe paau! jDioni pojojũ re'oja'chere i'kajũ pañu mai!”, chiisinaa'me repana.

5 Ûcuarũmũ Dios ñu'isaivũ rũichejapi chũ'o ija'che i'kache'te asasi'kũa'mũ chũ'ũ:

Diore mai Cuasakũ'te ùcuanũko re'oja'chere i'kajũ pañu mai, Repaũ'te vajũchũju cho'oche cho'okaina, vesũnana'me masina, chiiche'te.

Ovejachũija'ia romi vejache'te ja'me pojojũ fi-esta cho'ojachere kũamũ

6 Ûcuarũmũ pãipi jairepanũko i'kajũna asocheja'chena'me oko chã'ia asocheja'chena'me

okopi r̄uarepa curuk̄u asocheja'che asoche'te
ch̄u'o ija'che i'kache'te asasi'kua'm̄u ch̄u'u:

¡Dioni re'oja'chere i'kaj̄u pañu mai!

Dios, Maire Paak̄u peore Masīuji p̄ai ũcuan̄ukore
ch̄ũ'uk̄u'm̄u.

7 Ovejach̄iija'iu Jesucristo romi vejaumucusepi
t̄i'auna r̄ua pojoj̄u pañu mai.

“Peore masik̄u'm̄u m̄u'u”, chiiju pañu mai
repaũ'te.

Repaũ vejajao Repaũni vejara chini care'va
pa'io, k̄aña r̄ua re'ojak̄añare sa'che ju'io
cha'amo.

8 Lino k̄aña re'ojak̄añapi menoj̄e'e
peok̄añapi ko'sijak̄añare juhao chini
ĩsicoj̄ñosi'koa'mo repao.

Repak̄aña ju'iche Dios neena re'oja'che cho'ocheji
ñom̄u,
chiisinaa'me.

9 Ūcuar̄um̄u ángel ch̄u'ure i'kasi'kua'm̄u.
“Tochaj̄ũ'u ie: Jesucristo Ovejach̄iija'iu romi
vejache'te ja'me pojoj̄u fiesta cho'oa'ju chini
soicoj̄nojana pojoj̄u paapu”, chiisi'kua'm̄u. Chini
jo'e cheke ija'che i'kasi'kua'm̄u repaũ: “Ch̄u'o
ũcuarepaa'me j̄ã'a, Dios i'kasi'ejek̄u”, chi-
isi'kua'm̄u repaũ ch̄u'ure.

10 Chik̄una asa repaũni pojora chini
repaũ ti'j̄ñeñena ro're p̄uũ ñu'iana ija'che
i'kasi'kua'm̄u repaũ ch̄u'ure: “¡J̄ã'aja'ñe
cho'omanej̄ũ'u! M̄u'na'me m̄u'u majap̄ijana
Jesucristoni cuasaju Repaũ pa'iche'te kuaju
cu'ache ti'j̄ñecoj̄ñonata'ni Repaũ'te cuasache
ũhasõma'ñe Repaũ ch̄ũ'uñe cho'okaiju pa'iche'te
ũcuare cho'okaik̄u'm̄u ch̄u'u. Diorechi'a ro're

ꞑꞑꞑ ñu'iu pojojũ'ũ", chiisi'kua'mu repau chu'ure. Dios chu'o aperamu kúasinapi Jesús pa'ijache kuaꞑu tocha jo'kaasome.

Poja'iu ni kavacho'te tuhiku cho'osi'ere kamu

11 Ūcuarumu cunaumupi vatauna kavacho'te poja'iu ni ñasi'kua'mu chu'ũ. Repau'te tuhiku pãi rũhiñe chũ'ũkují rúa pãí vaimasikujeku ija'che i'kacojñoku'mu: "Repau cho'ora chiiche ũcuarepa cho'oku'mu iku. Chu'o ũcuarepare i'kaku'mu iku", chiicojñoku'mu.

12 Repau ñakocaã toñaja'ñe Paakují tuhivũã ruarepavũã tuhisi'kua'mu. Ūcuachi'a Repau ca'nivũ'te mami tochasi'e paasi'kua'mu, Repauchí'a te'eũ masiche.

13 Kãa chie chũ'ũsikãare ju'iu pa'isi'kua'mu Repau. Repau mamia'me ie: Dios chu'o Kúaku Jesucristoa'mu Repau.

14 Repau cho'jepi cunaumu pa'ina sõtaopãí lino kãña rúa re'ojakãñapi menoje'e peokãñapi pojakãñare ju'ijũ kavacho pojanapi tuhijũ raisinaa'me.

15 Repau chu'opoji va'ti jũjũsũche cũ'tosiva'ti etasi'kua'mu, pãí si'achejña pa'inare Repau cavaku cajejajava'ti. Repau'te cuhenare cajejani chũ'ũku Dios peore Cho'omasikují pãire pe'rukũ cu'ache cho'oche'te chũ'ũuna, kavacho'te tuhiku repanare pãí cu'ache cho'okaija'mu. Repauji vaiuna repaña chie, uche chacha chachojuna uche oko menisõñeja'ñe ranisõja'mu, repaña cu'ache cho'osi'e ro'i.

16 Repau ju'ikāana'me toapu, ija'che tochasi'e paasi'kua'mu repau: "Pāi chũ'una ũcuanako Aia'mu iku", chiiche'te.

17-18 Ūcuarumu ángel'te ũsuu asuche chuvochejare nukaku, cunaumu cāva ku'inani vacho ũcuanakore soiu ũjachu'opi cuiku ija'che i'kaku soikuni ñasi'kua'mu chu'u: "Rani chi'i Dios aũne va'i aijũ'u, jūnisōsina va'i, pāi chũ'una va'i, sōtao aina va'i, kokarekoñoā paana va'i, kavacho va'ina'me repanare tuhisina va'i, chekuna va'i si'ache peore chēacojñomanesinana'me chēacojñosina va'i, vesuna va'ina'me masina va'i", chiuu soisi'kua'mu repau.

19 Ūcuachi'a cu'arepache cu'aku'te icheja cheja pa'inare pāi chũ'unana'me repana neena sōtaopāi chi'i, kavacho'te tuhikuni Repau'te ja'me pa'inani sōtaopāire cavañu chini chi'ijuna ñasi'kua'mu chu'u.

20 Ūcuarumu repau cu'arepache cu'aku chekuna'me chēacojñosinaa'me. Ūcuauji chũ'una cheku, "Dios chu'o kuaku'mu chu'u", chiuu joreu aperumu Diochi'a cho'omasicheja'che Repauji ũsemauna cho'osi'kua'mu. Jā'aja'ñe joreku cho'okuna ña, "Iku cho'оче ũcuarepaa'me", chini jachama'ñe cuasaju pāi repana ca'nivũña repau cu'arepache cu'aku mami tochacojño ũcuaujava'ure tũosi'kuni pojosinaa'me. Ūcuarumu repana ka'chana joresi'kuna'me cu'arepache cu'aku, toa azufreji ruu cu'asuche uutoana saocojñosinaa'me.

21 Chekunata'ni kavacho'te tuhikuni cavaju repau chu'opo etasiva'tipi chuenisōsinaa'me.

Chuenisõrena repanare peore vachopi rua chajiche ãisinaa'me.

20

1 Ûcuarũmu ángel'te na'a pa'isirũmu cunaũmũpi llavemaka vati pa'icoje tũsomakana'me ʷjacũname cãjikũ cajekũni ñasi'kua'mũ chũ'ũ.

2 Cajẽ añaja'iu'te aperũmũna pa'ikũ'te vati aina'me Satanás ve'ekũ'te ũcuameji tachosi'kua'mũ repaũ, milrepaũsurũmu tachocojñosi'kũ paau chini.

3 Cũnameji tachosi'kũni cojena caso jaoko'api ta'pi tacho jo'kasi'kua'mũ repaũ, repaũji pãĩ ũcuanũkore milrepaũsurũmũjatũ'ka jorekũ cacũ'oma'ñe paau chini. Milrepaũsurũmu pa'isirũmũna jo'e etocojño cheja jma-makarũchi'a pa'iu jorekũ pãire cacũ'okũ pa'isi'kua'mũ repaũ vati ai.

4 Ûcuarũmu pãĩ chũ'ũna ñu'isaivũã ñasi'kua'mũ chũ'ũ. Repasaivũã ñu'ina pãĩ ũcuanũko cho'osi'e ro'iche chũ'ũmasiche'te jo'kacojñosinaa'me. Ûcuachi'a Dios chũ'ona'me Jesucristo pa'iche'te re'oja'che kũaju sũjo tũ'secojñosiva'na rekoñoã ñasi'kua'mũ chũ'ũ. Vajurũmu repava'na cu'arepache cu'akũ'terejẽ'e pojoma'ñe ũcuauja'iu'te tũosiva'urejẽ'e pojomanesinaa'me. Ûcuachi'a repana chiaruãna'me repana jũjña cu'arepache cu'akũ mamĩ tochacojñocuhesinaa'me repana. Reparũmu repana Diopi vasũna vajurani pa'iju Dios Raosi'kũ Cristona'me milrepaũsurũmu pãire chũ'ũju pa'isinaa'me.

5 Jã'ata'ni chekũva'na jũ'isiva'na reparũmũ vajuraimanesinaa'me, milrepaũsurũmũ pa'isirũmũjatũ'ka. Repana sũjo tũ'secojũnosiva'na Diopi vasũna chekũnare pãi charo vajuraisinaa'me.

6 Chekũna repana vajuraisi'ēja'che charo vajuraisina ũcuanũko pojojũ pa'isinaa'me. Dios repanare Repaũ neenajejũna vati toa saomanesi'kua'mũ. Jã'ajekũna phairipãi cho'okaicheja'che Repaũ chũ'ũña'na'me Repaũ Raosi'kũ Cristo chũ'ũña cho'okaijũ pa'isinaa'me repana. Ũcuachi'a Cristona'me milrepaũsurũmũ pãire chũ'ũjũ pa'isinaa'me repana.

Vati ai toana saocojũnojañere kua'mũ

7 Milrepaũsurũmũ pa'isirũmũna vati ai chẽacojũnosi'kũ etocojũnosi'kua'mũ.

8 Etoarena sani pãi si'achejũna pa'inare jorekũ, "Pãi chekũnani cavajaũu mai", chiisi'kua'mũ repaũ, Gog cheja canana'me Magog cheja canare. Jorekũ jã'aja'ña i'kakũna asa jachama'ña repana neenare sũtaopãi mar chiara mejacaãjanũkore cavajaũu chini chi'isinaa'me.

9 Chi'i pi'ni cheja si'achejũna peore sani Dios neena pa'ijoopo rũhiso'koro pachu nukasinaa'me repana, Dios oiũ paajoopo Jerusalén vũ'ejoopo pa'inani pãire cu'ache cho'oũu chini. Jã'ata'ni repanare Diopi chũ'ũna toa cũnaũmũpi tuãni peore uusũsi'kua'mũ.

10 Repanare jorekũ cacũ'osi'kũ vati ai ũcuachi'a toana azufreji rũa cu'asũche uutoana saocojũnosi'kua'mũ, cu'arepache cu'akũna'me,

“Dios chũ'o kũakũ'mũ chũ'u”, chiiũ joresi'kũre saosichejana. Ũcuatoare pa'ijũ ñamina'me umucujña si'arũmũ uujũ pa'isinaa'me repana.

Pãi ũcuanũko Dios chũ'ũkũ ñũ'isaivũ poja-saivũ ti'jñeñe nukajũna Dios repana cho'osi'e peore ro'ia'ju chini chũ'ũjañere kũamũ

¹¹ Ũcuarũmũ ñũ'isaivũ ʋjasavũji pojasaivũ'te ñakũ repasaivũ ñũ'ikũ'te Diore ũcuachi'a ñasi'kũa'mũ chũ'u. Repaũ ñakũ'te chejana'me cũnaũmũ teana peore si'asõ, jmamakarũjẽ'e jo'e ñomanesi'kũa'mũ.

¹²⁻¹³ Reparũmũ pãi jũ'isinare mar chiaraã runi cho'osõsinana'me jũnisõ cheja sa'navũ tãcojño jũ'isina pa'icheja pa'isinare masisinana'me vesũsinare vajũrani, Dios chũ'ũkũ ñũ'isaivũ ti'jñeñe nukananĩ ñasi'kũa'mũ chũ'u. Nũkajũna Dios utija'ophũ vatasi'kũa'mũ. Chekũphũro ũcuachi'a Repaũna'me pa'ijana mami pa'iphũro'te vatasi'kũa'mũ Repaũ. Ũcuaphũre pãi ũcuanũko cho'ojũ pa'iche peore tochasi'e pa'isi'kũa'mũ. Jã'ajekũna repanare ũcuanũkore repaphũqueere tochasi'e ñakũ repana cho'osinũkorũã pa'iche ro'iche chũ'ũsi'kũa'mũ Repaũ, re'oja'che cho'osi'ena'me cu'ache cho'osi'e.

¹⁴ Jã'aja'ñe cho'o pi'ni pãipi jo'e jũnisõma'ñe paarũ chini jũnisõñena'me jũ'isina saichejapi peoa'kũ chini chũ'ũsi'kũa'mũ Repaũ.

¹⁵ Ũcuachi'a Repaũna'me pa'ijana mami tochasiphũro repana mami tocha-cojñomanesinare vati toana saõna jo'e

etama'ñe ñcuatoare si'arumũ uujũ pa'ijanaa'me repaña.

21

*Cũnaumũ mama cho'osiũmũna'me cheja
mama cho'osicheja ñasi'ere kũamũ*

¹ Jã'a ñacuhasirumũ charo pa'isichejñari cũnaumũna'me chejana'me mar chiara si'asõũna cũnaumũ mama cho'osiũmũna'me cheja mama cho'osichejare ñasi'kũa'mũ chũ'ũ.

² Reparumũ Dios neejoopo mama Jerusalén vũ'ejoopo Repañ pa'ichejari cũnaumũpi cajũna ñasi'kũa'mũ chũ'ũ. Romio umũũ vejari'rako kãña re'oja'chere sa'che ju'iona re'oja'che ñoñeja'ñe ñosi'kũa'mũ repajoopo.

³ Ñcuarumũ Dios ñu'isaivũ rũichejari chũ'o ujachũ'opi ija'che i'kache'te asasi'kũa'mũ chũ'ũ: “Dios chura pãina'me pa'imũ. Repanani ja'me pa'ũna Repañ neena pa'ijanaa'me repaña. Ñcuauji repanare ja'me pa'ũ paaja'mũ chura.

⁴ Ñcuachi'a repaña oijũ sumava'na pa'isi'e Diopi re'oja'che cho'okakũna pojoju pa'ijanaa'me repaña. Repaña aperumũ pa'ijũ pa'isi'e jũnisõñe, ota oiche, rupũ oichena'me asiche si'asõũna peoja'mũ reparumũ.”

⁵ Ñcuarumũ repasaivũ Ñu'ikũ Dios ija'che i'kasi'kũa'mũ: “Peore mama cho'omũ chũ'ũ”, chini jo'e ija'che i'kasi'kũa'mũ Repañ: “Chũ'ũ chũ'o ñcuarepajekũ chũ'ũ i'kache peore ñcuarepa ti'jñeja'mũ. Jã'ajekũna ie chũ'o tochajũ'ũ mũ'ũ”, chiisi'kũa'mũ Repañ chũ'ũre.

6 Jã'a i'kacuha jo'e ija'che i'kasi'kua'mu Repau chu'ure: "Peore cho'o pi'nicuhasi'ea'me. Chuta'a cheja cho'omarumujẽ'e pa'ia si'arumu pa'iku'mu chu'u. Pãi okouava'naja'ne re'oja'che pa'iuava'nare okore s̄ejuna ũkuacheja'che pa'iche re'oja'chere oko puni si'ama'ne oko raicheja'che si'arumu re'oja'che pa'iche'te rupu ĩsija'mu chu'u repanare.

7 Chu'uni cuasaju cu'ache cho'ocojñonata'ni chu'ure cuasache ũhasōmanesinare pa'iche re'oja'chere ĩsija'mu chu'u. Ũcuaja'che chu'upi repanani paakuna chu'u chĩijana pa'ijanaa'me repana.

8 Jã'ata'ni pãi chekunare vajuchunare, Repau'te cuasamanare, pãi chekunare cuhenare, pãi vanisōnare, repana pa'imanare ja'me kãinare, chai cho'onare, rupu t̄osiva'nare cuasaju pojonare, jorenare ũcuanukore peore jã'anare vati toana azufreji rua cu'asuche uutoana saoja'mu chu'u Dios. Saoana jo'e etama'ne ũcuatoare si'arumu uuju pa'ijanaa'me repana", chiisi'kua'mu.

Jerusalén mama cho'osijoo po pa'iche'te kummu

9 Ũcuarumu ángeles sieterepana pãire cuha-cho cu'ache cho'ojachere maña timusiro'ro coparo'ro sietereparo'ro cãjina te'eũ rani ija'che i'kasi'kua'mu chu'ure: "Raijũ'u. Mu'uni, Dios Mamakũ Ovejachĩija'ia vejaoja'che pa'inani Repau neenani ñora", chiisi'kua'mu.

10 Ũcuarumu repau ángel chu'ure Dios Rekochoji cho'oana aikũti rua ujakũtipi rua umu pa'ikũtina mua Dios neejoo po

Jerusalén vu'ejoopo Repau pa'icheja cajejoopo'te ñosi'kua'mu chu'ure.

11 Diopi ũcuajoopo'te pa'iuña Repau ko'sija'icheji miajoopo pa'isi'kua'mu repajoopo. Cata rua ro'ipuã jaspe cata ko'sija'icheja'chena'me joicuna etajaiche ñoñe ko'sija'icheja'che ko'sijajoopo ñosi'kua'mu repajoopo.

12 Ũcuachi'a repajoopo ru'tuva si'acakã'jño catapi ñekua je'na pachusi'pa wjachu'rivaji umu nukapa pa'isi'kua'mu. Jatisa'ñaroã docerepasa'ñaroã pa'isi'kua'mu repapa. Repasa'ñaroã tijñapaã ángel te'enachi'a nukasinaa'me. Ũcuachi'a Israel jojocojñosina docerepavãju mami tochasi'e pa'isi'kua'mu repasa'ñaroã.

13 Ũcuachi'a ũsumu muikã'ko chotesa'ñaroã jatisa'ñaroã pa'isi'kua'mu repapa. Co'covu cakã'ko ũcuachi'a chotesa'ñaroã pa'isi'kua'mu, suripu cakã'ko ũcuajanuko. Ũsumu na'ikã'ko ũcuajanuko pa'isi'kua'mu repapa.

14 Charo ñekuasi'puã catapuã docerepapuã pa'isi'kua'mu repapa. Ũcuapuãre Ovejachũja'iu Jesucristo neena, Dios chu'ore chu'vaa'ju chini Repau saosina docerepana mami tochasi'e pa'isi'kua'mu.

15 Repau ángel chu'ure i'kasi'ku pachokuricunaño cãjisi'kua'mu, vu'ejoopona'me jatisa'ñaroãna'me repajoopo je'nasi'pa cuasa ñajaño.

16 Repajoopo vu'ejoopo repacuechona'me repaã'capuna'me repaumu si'acakã'jño ũcuapa'ruvachi'a pa'iu rũhivãja'ñe

pa'isi'kua'mu. Angel, repau cãjiñoji repajoopo pa'iche'te cuasa ñato repacuechona'me repaumna'me repaã'capu ũcuajanukochi'a pa'isi'kua'mu, dos mil doscientos kilómetrochi'a.

17 Jã'a cuasa ñacuha repajoopo je'na pachusi'pa umu pa'iche'te ángel, pãi cuasa ñañeja'ñe cuasa ñato sesenta y cinco metros pa'isi'kua'mu repapa.

18 Repapa jaspe catapi je'nasi'pa pa'isi'kua'mu. Repajoopo vñ'ejoopo pachokurirepapi cho'osijoopo pa'isi'kua'mu, joicunaja'ñe ko'sija'che ñoñeji.

19 Catapuã ujapuã docerepauã charo ũha pachusipuã jmara'karuãpi si'ara'karuã ruã ro'ira'karuã ũcuapuãna je'nasira'karuã su'isi'kua'mu. Charo ũhasi'pu jaspe catapu vñjañeja'ipu pa'isi'kua'mu. Cho'je ũhasi'pu zafiro catapu chira'soja'ipu pa'isi'kua'mu. Chekupu ágata catapu vñjañeja'ipu pa'isi'kua'mu. Chekupu esmeralda catapu vñjañeja'ipu pa'isi'kua'mu.

20 Jo'e chekupu ónice catapu chija'chena'me poja'ipu pa'isi'kua'mu. Chekupu cornalina catapu maaja'ipu pa'isi'kua'mu. Chekupu crisólito catapu pachoja'ipu pa'isi'kua'mu. Chekupu berilo catapu ra'sovñjañeja'ipu pa'isi'kua'mu. Chekupu topacio catapu pachovñjañeja'ipu pa'isi'kua'mu. Chekupu crisopraso catapu vñjañeja'ipu pa'isi'kua'mu. Chekupu jacinto catapu ra'soja'ipu pa'isi'kua'mu. Chekupu amatista catapu chimaaja'ipu pa'isi'kua'mu.

21 Jatisa'ñaroã docerepasa'ñaroã perla

catako'ña te'eko'ñachi'api cho'osisa'ñaroã pa'isi'kua'mu. Repajoopo pa'ijoovu callejoovu pachokurirepapi cho'osijoovu pa'isi'kua'mu. Joicunaja'ñe etajaiche ñosi'kua'mu.

²² Repajoopo chu'u ñato si'achejña Dios vu'ejë'e peosi'kua'mu. Maire Paaku Dios Peore Masikuna'me Repau Mamaku Ovejachijja'iu repa vu'eja'chea'me.

²³ Ūcuachi'a Dios ũcuare ko'sija'iuji pa'iana Repau Mamaku Ovejachijja'iujë'e uoru miañeja'ñe pa'iana ũsuu miañe chiimau pãimiau miañejë'e chiima'mu repajoopo.

²⁴ Pãi Dios chëa paacojñona icheja si'achejña pa'ina Repau miañeji ñaju nuka ku'ijanaa'me repajoopo. Pãi chũ'una ũcuachi'a ũcuajoopo'te pa'iju pãi cheja pa'ina repanare aperumu pojosi'eja'che Dioni pojojü pa'ijanaa'me.

²⁵ Ūcuachi'a repajoopo jatisa'ñaroã repachejapi ñami peochejajekuna jmamakarujë'e jeoma'ñe si'arumu vatasisa'ñaroãchi'a pa'ija'mu.

²⁶ Ūcuachi'a pãi si'achejña pa'ina ũcuajoopo'te pa'iju Dioni pojojü pa'ijanaa'me.

²⁷ Pãi cu'ache cho'onata'ni te'eujë'e kakamanejanaa'me repajoopo. Ūcuachi'a pãi vajuchuache ñoñe cho'onana'me jorena kakamanejanaa'me repajoopo. Ovejachijja'iu Jesucristo utija'ophuro repa mami tochacojñosinachi'a kaka pa'ijanaa'me repajoopo.

22

¹ Ūcuarumu repau ángel chu'ure Dios

ñu'isaivũ rũichejana'me Repaũ Mamakũ Ovejachĩija'ia ñu'isaivũ rũichejapi eta mevoña'te chiacha rũa ko'sija'ichaji oko ũkuni jo'e jũnisõma'ñe ai pa'icha'te ñosi'kua'mũ.

² Repajoopo callejoovũ joopoji mevosi'kua'mũ repacha. Vajusũkiñũ repacha ru'tuva nukañũ kapi chiacha ka'chakã'jño jasi'e nukasi'kua'mũ. Repañũ sũkiñũ pãimia pa'iche ãu kũisi'kua'mũ. Jã'ajekuna te'eũsurumu docerepañoã kũisi'kua'mũ repañũ. Ja'o repañũquee pãĩ jũ'ina suiri vajũcheja'che repana rekoñoã vajũrekoñoã care'oja'oa'me.

³ Repajoopo vũ'ejoopo jmamakarũjẽ'e cu'ache cho'ocojñomanaja'mũ. Dios chũ'ũku ñu'isaivũna'me Repaũ Mamakũ Ovejachĩija'ia chũ'ũku ñu'isaivũ ũcuajoopo'te pa'ija'mũ. Repaũ'te cho'оче cho'okaina Repaũ chũ'ũñe cho'oju pa'ijanaa'me.

⁴ Ũcuachi'a Repaũna'me pa'iju Repaũ chia ti'jñeñe ñaju, repana chiapũãre repaũ mami tochasi'e paajanaa'me.

⁵ Ũcuachi'a ñamijẽ'e peoja'mũ repajoopo. Dios Maire Paakũ ũcuare Miakũji pa'ina repacheja pa'ina uopũ miañejẽ'e ũsũ miañejẽ'e chiimanejanaa'me. Ũcuajoopo'te pa'iju Diona'me si'arũmũ chũ'ũju pa'ijanaa'me repana.

Jesús jo'e raipi'rache'te kuamũ

⁶ Ũcuarũmũ ángel chũ'ũre jo'e ija'che i'kasi'kua'mũ: "Te chũ'o ũcuarepaa'me. Chũ'ũ i'kache ũcuarepa ti'jñeja'mũ. Maire Paakũ Dios, Repaũ chũ'o aperũmũ kuasinare Repaũ Rekocho'te ĩsisi'kua'mũ. Repaũ neekuni

ángel'te raosi'kua'mu Repau, Repau chũ'uñe cho'onani cheja cho'ocojñojañere kuaa'ku chini", chiisi'kua'mu.

7 Ūcuarumu Jesucristo ija'che i'kasi'kua'mu: "Asarepajũ'u. Na'mi raija'mu chu'u. Na'a pa'isirumu cho'ocojñojañere kuaju utija'ophuro tocha jo'kasi'e asa jachama'ñe cho'ona pojoju paapu. Re'oja'che ti'jñeja'mu repanare", chiisi'kua'mu.

8 Chu'u, Juan, jā'a peore ñaku asasi'kua'mu. Peore ñaku asacuasirumu chu'ure kaku ñosi'ku ángel ti'jñeñena ro're puusi'kua'mu chu'u, repauni pojora chini.

9 Jā'ata'ni repau ángel chu'ure ija'che i'kasi'kua'mu: "Jā'aja'ñe cho'omanejũ'u. Mu'una'me mu'u majarpãijana Dios chu'o kuanana'me iphuro kuaju tochasi'e asa jachamana Dios chũ'uñe cho'okaicheja'che cho'okaiku'mu chu'u. Jā'ajekuna Diorechi'a ro're puu ñu'ia pojojũ'u mu'u", chiisi'kua'mu repau chu'ure.

10 Ūcuachi'a ija'che i'kasi'kua'mu repau chu'ure: "Na'a pa'isirumu ti'jñejañere kuaju iphuro tochasi'epi cho'ocojño'pirakuna, te'eu masira chiimanejũ'u.

11 Iphuro kuasi'e ti'jñerumu cu'ache cuasaju cu'ache cho'ona pãi cuhama'ñe ūcua cu'ache cho'ojũ pa'ijanaa'me. Ūcuachi'a re'oja'che cuasaju re'oja'che cho'ona ūcua re'oja'che cho'ojũ pa'ijanaa'me. Diore masi cuasana Repau'te cuasache ūhasõma'ñe ūcua cuasaju pa'ijanaa'me reparumu", chiisi'kua'mu.

12 Ūcuarum̄ Jesucristo ija'che i'kasi'kua'mu: "Asarepajũ'u. Na'mi cajeja'mu chu'u. Reparum̄ pãi ūcuanukore repaña cho'osi'e ro'iche chũ'uja'mu chu'u, re'oja'che cho'osi'ena'me cu'ache cho'osi'e ro'i.

13 Chuta'a cheja cho'omarum̄jē'e pa'iu si'arum̄ pa'ikũ'mu chu'u", chiisi'kua'mu.

14 Pãi repaña rekoñoã re'ojarekoñoã cu'a tuncocojñosina repajoopo kaka pa'ijũ vajúsjũkiñũ kũisi'e ãijana pojoju paaru.

15 Jã'ata'ni pãi ija'che pa'inare repajoopo kakacu'aja'mu: jamuchai kokaneenaja'ñe cu'ache cho'onare, chai cho'onare, repaña pa'imanare cu'a cho'onare, pãi vanisõnare, rupũ tũosiva'nare pojonana'me, jorenare ūcuanukore.

16 Jesús ija'che i'kamũ: "Chu'u, Jesupi, chu'u neekũre ángel'te saosi'kua'mu, chu'ure cuasakuanupũãre chu'ore kuakaau chini. Aperum̄ pa'isi'ku David Jojocojñosi'kua'mu chu'u. Chu'ure cuasanare ūcuanukore vañũũ miañeja'ñe re'oja'che pa'iche si'ache isiku'mu chu'u", chiimũ.

17 Dios Rekochona'me Ovejachĩija'iu rãjoja'ñe pa'ina, Repau'te cuasana, ija'che i'kame: "Raijũ'u", chiime. Ūcuachi'a ūcuauana ichũ'o asa jachama'ñe cuasana, "Raijũ'u", chiaru. Pãi okouava'naja'ñe re'oja'che pa'iuava'na rani okore kuri sēema'ñe rupũ ūkua vasocheja'che repaña rekoñoãna cho'okaicojñoju re'oja'che pa'ijanaa'me.

18 Na'a pa'isirum̄ cho'ocojñoja'ñe iphũro kuaju tochasi'e asanare ija'che i'kaku chu'vamũ chu'u: Pãiu ūcuauakũji iphũro tochasi'ere ñaku,

“Karamu ie”, chini ũcuauji te'eũ cuasa tĩĩñere chekũnare che'chokũ'te, Diopi chũ'ũna iphũro kũaju tochasi'epi cu'ache ti'jĩjeja'mũ repau'te.

¹⁹ Ũcuachi'a pãiu ũcuauakũji na'a pa'isirũmu cho'ocojĩojañere kũaju iphũro tochasi'ere ña, cuheku tuasõto Dios ũcuaja'che Repau vu'ejoopo iphũro tochasi'e i'kacojĩojooopo kakache ũseja'mũ. Ũcuachi'a repajoopo cañũ vajuũkiñũ kũisi'e ãimaneja'mũ repau.

²⁰ Iphũro tochasi'e, “Peore ũcuarepaa'me”, chiikũji Jesucristo ija'che i'kamũ: “Na'mi cajeja'mũ chu'ũ”, chiimũ. ¡Jã'aja'ñe paau! ¡Chukũna'te Paaku Jesucristo, raijũ'ũ!

²¹ Maire Paaku Jesucristoji ũcuaukore re'oja'che cho'okaiũ paau musaukonare. ¡Jã'aja'ñe paau! Re'omũ.

Koreguaje

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025

87a345ac-83c6-51ad-8750-17a703f38bcc